



**B r o j :** 02-05-340/19

**D a t u m,** 26.02.2019. godine

**ZAPISNIK**  
**sa 24. redovne sjednice 6. saziva Općinskog vijeća Doboj Istok**

*Dvadesetčetvrta redovna sjednica 6. saziva Općinskog vijeća održana je dana 23.02.2019. godine u zgradi općine Doboj Istok, u Klokočnici, sa početkom u 10,00 sati.*

*PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Sulejman Delić, pomoćnik općinskog načelnika za civilnu zaštitu, Alirizah Mujkić, pomoćnik općinskog načelnika za poduzetništvo i finansije, Enes Bećirović, pomoćnik općinskog načelnika prostornog uređenja i Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Safet Ibrahimović, načelnik Policijske uprave Gračanica, Faruk Avdagić, komandir Policijske stanice Doboj Istok, Taib Alihodžić, predsjednik MZ Lukavica Rijeka, Esad Hasanamidžić, sekretar MZ Stanić Rijeka, Mehmed Mehinović – Medle, predstavnik MZ Brijesnica Velika, Lejla Hasanović, općinski pravobranilac, Samir Mujkić, stručni saradnik za ruralni razvoj, te predstavnik RTV TK.*

*ODSUTNI: Mirzet Mujkić, vijećnik SDA i Fajik Muratović, vijećnik SDP.*

*Sjednicu je otvorio i vodio predsjedavajući Općinskog vijeća, dr. Ferid Konjić.*

*Dr. Ferid Konjić, predsjedavajući Općinskog vijeća: „ Na početku sjednice selamim općinskog načelnika sa saradnicima, kolegice i kolege vijećnike i goste. Otvaram 24. redovnu sjednicu ovog saziva Općinskog vijeća. Izostanak su najavili Mirzet Mujkić i Fajik Muratović.“*

**VIJEĆNIČKA PITANJA I INICIJATIVE**

*Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu.“*

*Emira Karić, predsjednica kluba vijećnika SDP: „ Srdačno bih poselamila i pozdravila sve prisutne. Za ovu sjednicu pripremila sam jednu vijećničku inicijativu i jedno vijećničko pitanje. Počet ću od vijećničke inicijative.*

*Ova vijećnička inicijativa se odnosi na postavljanje veoma visokog stuba na kojem bi bila velika jumbo zastava Bosne i Hercegovine. Nadležna služba bi odredila pogodno mjesto za postavljanje stuba npr. početak ili sredina naše općine.*

*Obrazloženje:*

*Smatram da bi sve općine u Bosni i Hercegovini trebale imati stalno vidljivo obilježje naše države, a ne samo isticati državna obilježja kada to nalaže zakonska regulativa tj. u vrijeme obilježavanja državnih praznika. Budući da se ne radi o velikom finansijskom poduhvatu novčana sredstva se mogu obezbijediti iz budžetske rezerve ili sa konta koji odredi sam načelnik.*

*Mogla bih tu dodati još nekoliko stvari. Taj stub se može nabaviti u firmi u Gračanici, a što se tiče te velike jumbo zastave ona bi se mogla skrojiti i sašiti u našim krojačkim radnjama. Znači ni to ne predstavlja neki veliki projekat.*

*Vijećničko pitanje.*

*Hoće li naša općina sa nadležnim službama riješiti problem otvorenih kanala duž magistralnog puta?*

*Budući da znam da taj prostor nije u nadležnosti naše općine ipak smatram da je to itekako problematika u koju se naša općina mora uključiti. Otvoreni kanali kroz koje teku fekalije su veliki i*

*direktni izvori zaraze koje prenose životinje koje sve više nalaze tu svoje stanište. Takođe u posljednje vrijeme sve više vozača zbog određenih okolnosti završavaju baš u tim kanalima.“*

*Hasan Hasančević, predsjednik kluba vijećnika SDA: „ Uvaženi načelnice sa saradnicima, predsjedavajući, zamjeniče, kolege i kolegice, gosti želim iskreno da vas poselamim i pozdravim. 100 puta smo pričali o inicijativama. Inicijativa je dobra, ali način rješavanja, može li načelnik to i to, to i to. Zna načelnik da to treba, ali ima li sredstava? Trebali smo na početku godine kada se budžet oformljivao, odnosno konstruisao i radio predložiti to i to i gotovo. Nisu to baš mala sredstva i nije to tako u Gračanici. Ko je vidio u Doboj Jugu kako izgleda i ispod onog kriterija mi ne bi trebali ići, trebali bi ići iznad. Ono otprilike košta 40.000 KM, a ja mislim da u budžetskoj rezervi toga nema. Da, oko 40.000 KM, mi smo se informisali. Ono je jedna od najvećih zastava u BiH, tako da ispod toga ne može. Inicijativa je dobra, ali ja ne vidim realizaciju. Rekli smo sto puta kada se nešto predloži, način finansiranja, završetak konstrukcije i to je to. Mi ne možemo podržati ovo.“*

*Kemal Bratić, općinski načelnik: „ Poštovani predsjedavajući, zamjeniče, uvaženi vijećnici, uvaženi gosti esalamu alejkum. Ja nisam stigao sa Hasanom razgovarati, mi smo već pokrenuli određene radnje vezano za vašu inicijativu tako da mislim da nema potrebe da se izjašnjavamo o vašoj inicijativi. Radimo sa udruženjem građana i vjerovatno u toku ove godine, ako Bog da, ćemo odrediti jednu lokaciju na jednom od naših uzvišenja i na području općine Doboj Istok ćemo to uraditi. Da li će to biti, kao što Hasan kaže, tih veličina, ali ako stavimo na neko uzvišenje onda će i manja zastava ispuniti nekakve uslove ili zadovoljiti da se vidi maltene sa cijele naše općine. Tako da smo mi pokrenuli i ja sam službi dao nalog da nađu lokaciju gdje bi postavili taj jarbol i tu zastavu naravno u saradnji sa udruženjem građana.“*

*Emira Karić, predsjednica kluba vijećnika SDP: „ Ispast će da prepisujem, jer nekoliko inicijativa su već pokrenute, a o tome se nikada nije pričalo na općini Doboj Istok. Ja imam još jedan prijedlog da budem u nekoj komisiji koja će sprovesti tu neku pripremnu proceduru. Mogu slobodno reći da ću dobiti neke povlastice od firme iz Gračanice. Gospođa je rahmetli Fišina žena, hajmo reći, dobra prijateljica i mogla bih iskoristiti i taj čin dobre volje. Naravno nisam mislila da će inicijativa biti prihvaćena. Takođe bih se uključila i u šivenje zastave, tako da bih, Hasane, možda za iduću sjednicu ponovo pročitala sa cijenama i sa svim ostalim što je potrebno. Mislim da se uvijek iz budžetske rezerve mogu ovakve stvari iskoristiti. Razvijanje patriotizma itekako je potrebno u cijeloj Bosni i Hercegovini, pa krenimo i mi kao općina Doboj Istok. Nisam mislila na tako veliki poduhvat kao Doboj Jug i ne moramo se ogledati, možemo nešto u minimalnijoj varijanti, a da to bude ipak način na koji mi izražavamo partiotizam i sve ono šta ta riječ podrazumijeva.“*

*Kemal Bratić, općinski načelnik: „Ja se zahvaljujem, ali mislim da nema potrebe da učestvujete, jer vi imate dovoljno poslova i privatnih i poslovnih, ali u svakom slučaju hvala. Nije to Doboj Jug, to je općina Tešanj. Zastavu su uradili privrednici općine Tešanj. Naravno i ja sam razmišljao i već sam razgovarao i sa nekim privrednicima koji će učestvovati u sufinansiranju ovog našeg projekta. Nije to prepisivanje, samo ja nisam smatrao da je to neki toliko značajan projekat da ja upoznajem Vijeće sa tim projektom. To je sitnica koju smo mi trebali davno uraditi i ne samo državnu zastavu, nego negdje na određenom mjestu i našu prethodnu zastavu kao što smo i ovdje stavili. U ovisnosti od toga kako će projekat ići, ne treba nama općina Gračanica da bi to uradili ili bilo koja druga općina. Ja mislim da mi imamo dovoljno snage, dovoljno kapaciteta i dovoljno dobre volje da sami napravimo jedan takav projekat. Vama u svakom slučaju hvala.“*

*Dr. Ferid Konjić, predsjedavajući Općinskog vijeća: „ Imamo vijećničku inicijativu o kojoj smo se mi trebali izjasniti, ali iz ove diskusije inicijativa je već u fazi realizacije. Koliko se ja razumijem ima li svrhe da se uopšte izjašnjavamo o inicijativi.“*

*Emira Karić, predsjednica kluba vijećnika SDP: „Budući da ja nisam znala da je u toku realizacija, tražim izjašnjenje.“*

*Dr. Ferid Konjić, predsjedavajući Općinskog vijeća: „Ko je za ovu vijećničku inicijativu?“*

*Glasanje: ZA – 6, PROTIV – 0, UZDRŽANIH – 9.*

## **USVAJANJE ZAPISNIKA SA PRETHODNE SJEDNICE**

*Dr. Ferid Konjić, predsjedavajući Općinskog vijeća: „ Dobili ste zapisnik sa prethodne sjednice i ukoliko ima primjedbi na zapisnik dajem priliku da se iznesu. Ne vidim prijavljenih. Ko je za zapisnik?“*

*Glasanje: ZA – 15, PROTIV – 0, UZDRŽANIH – 0.*

## **USVAJANJE DNEVNOG REDA**

*Dr. Ferid Konjić, predsjedavajući Općinskog vijeća: „ Dobili ste prijedlog dnevnog reda, a dobili ste i prijedlog za proširenje dnevnog reda, a odnosi se na: U skladu sa članom 56. Poslovnika o radu Općinskog vijeća Doboju Istok predlažem da se u dnevni red Općinskog vijeća stavi sljedeća tačka:*

- 1. Razmatranje Prijedloga Odluke o uvjetima i načinu raspolaganja nekretninama u vlasništvu Općine Doboju Istok.*
- Ima li ko potrebu nešto da kaže? Nema. Ko je za da se ova tačka uvrsti na dnevni red?*

*Glasanje: ZA – 15, PROTIV – 0, UZDRŽANIH – 0.*

*Ja nisam bio na Kolegiju, ali imam prijedlog da se ova 11. tačka Razmatranje zahtjeva Babić Emira za kupovinu nekretnine skine sa dnevnog reda, obzirom da mi danas treba da razmatramo i usvajamo Odluku koja reguliše to. Kroz ovu Odluku vidjet ćemo kakva je procedura i ovaj zahtjev ćemo usmjeriti u službu, pa će nam služba pripremiti. Do tada će Odluka biti objavljena i da nam ta tačka dođe na neki način pripremljena da ne dupliramo sebi posao i da ne raspravljamo o nečemu što nije adekvatno pripremljeno. Ko je za to da ovu tačku skinemo sa dnevnog reda?*

*Glasanje: ZA – 15, PROTIV – 0, UZDRŽANIH – 0.*

*Znači imamo opet 11 tačaka dnevnog reda i ova dopuna dnevnog reda bila bi prva tačka.*

*Usvojen je sljedeći:*

## **DNEVNI RED**

- 1. Razmatranje Prijedloga Odluke o uvjetima i načinu raspolaganja nekretninama u vlasništvu Općine Doboju Istok,*
- 2. Razmatranje i usvajanje prijedloga Odluke o naknadama za izdavanje i korištenje podataka adresnog registra Općine Doboju Istok,*
- 3. Razmatranje i usvajanje prijedloga Odluke o dodjeli mandata novom članu Savjeta MZ Stanić Rijeka,*
- 4. Razmatranje i usvajanje Izvještaja o radu Zajedničkog pravobranilaštva Čelić, Teočak, Sapna i Doboju Istok za 2018. godinu,*
- 5. Razmatranje i usvajanje Izvještaja o radu komunalnog inspektora za 2018. godinu,*
- 6. Razmatranje i usvajanje Izvještaja o radu savjeta mjesnih zajednica za 2018. godinu,*
- 7. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2018. godinu,*
- 8. Razmatranje i usvajanje Informacije o sigurnosti na području općine Doboju Istok za 2018. godinu,*
- 9. Razmatranje i usvajanje Informacije o pripremnim aktivnostima za proljetnu sjetvu 2019. godine,*
- 10. Razmatranje zahtjeva Mjesne zajednice Lukavica Rijeka za davanje saglasnosti za izgradnju ambulante,*
- 11. Razmatranje zahtjeva Hodžić (Smajla) Mehe iz Klokočnice za davanje saglasnosti susjeda,*

## **REALIZACIJA DNEVNOG REDA**

***Ad. 1. Razmatranje i usvajanje prijedloga Odluke o uvjetima i načinu raspolaganja nekretninama u vlasništvu Općine Doboju Istok.***

*Dr. Ferid Konjić, predsjedavajući Općinskog vijeća: „ Materijal te dobili, tačku dajem na diskusiju.“*

*Emira Karić, predsjednica kluba vijećnika SDP: „ Nekoliko puta sam pročitala ovaj prijedlog budući da nije bilo nacрта. Smatram odluku dobrom, jer ona rješava određene nejasnoće. Međutim ja bih ipak, sekretaru, da mi pojasnite neke članove. Da li bi možda moglo doći do izmjene, jer amandman može uvijek uložiti načelnik? Što se tiče člana 4. gdje kaže: Prodaja nekretnine u vlasništvu Općine, odnosno opterećenje pravom građenja nekretnina vrši se putem licitacije po cijeni koja se utvrđuje kao tržišna cijena na osnovu procjene ovlaštenog sudskog vještaka odgovarajuće struke. Kasnije se još nekoliko puta spominje sudski vještak koji vrši procjenu. Samo bih postavila pitanje: ko plaća tog sudskog vještaka, ako se plaća? Zatim član 16. kaže: Ako ne uspije prva licitacija, licitacija se ponavlja. Postoje li za tu drugu licitaciju određeni vremenski rok, odnosno vremenski rok za ponavljanje licitacije? Ovdje nije navedeno, a smatram da bi i to trebala biti ta neka zakonska regulativa. Član 19. Licitacija se može održati samo ako u njoj učestvuju najmanje dva učesnika. Ako se na licitaciju javi samo jedan učesnik, Komisija može pristupiti postupku prodaje neposrednom pogodbom. Da li se prva licitacija smatra neuspješnom ako se pojavi samo jedan učesnik, odnosno kada je neuspješna mora se ići na drugu licitaciju, pa onda da se može neposrednom pogodbom pristupiti prodaji? Znači ovdje nije navedeno da li je, a u slučaju ako se na prvoj licitaciji pojavi, da li to se smatra neuspješnom? Ja nisam razumjela. Što se tiče člana 21. Učesnicima u licitaciji, na njihov zahtjev, može se dozvoliti kraći rok za razmišljanje o daljim ponudama. Mislim da se prvo trebao navesti propisani rok za razmišljanje o daljim ponudama, pa onda dodati navedenu rečenicu. Međutim u članu 22. kaže: Licitacija se zaključuje ako i poslije drugog poziva nije u roku od pet minuta data veća ponuda. Ja kažem samo se radi o određenim finesama. Mislim da se u članu 21. trebalo istaći koji je rok za razmišljanje, odnosno da je to pet minuta ako to možemo pročitati iz člana 22. Takođe član 28. ako Komisija utvrdi da je prigovor osnovan, donosi odluku da se u cjelini poništi postupak licitacije i da se taj postupak ponovo sprovede. Takođe kažem nije naveden rok za sprovođenje ponovnog postupka. Član 37. imamo zamjenu nekretnina. Većina u Općinskom vijeću je odobrila jednu zamjenu nekretnina, ali bez ove Odluke o uvjetima i načinu raspolaganja nekretnina u vlasništvu općine Doboj Istok. Samo bih postavila pitanje je li to odobrenje validno, ako nismo imali ovakvu odluku?“*

*Omer Hadžić, sekretar Općine: „ Pošto se prvi puta javljam sve vas pozdravljam i selamim. Troškovi sudskog vještaka uračunat će se u prodajnu cijenu u kupoprodajnom ugovoru. Što znači da onom što kupuje mi ćemo to u cijenu uračunati. Ako licitari počnu sa 30 KM puta kvadrata, plus ti troškovi i drugi troškovi koje mi imamo će biti u cijeni. Faktički Vijeće donosi odluku da će se vršiti prodaja po toj cijeni i određuje se kapara koja je ovdje rečena. U slučaju da do zaključenja ugovora ne da kaparu, znači da je odustao i propada mu kapara. Licitacija je uspješna samo ako su dva i ako nema dva nije uspješna. Postoje i izuzeci ako licitacija ne uspije i ovdje je procjena komisije. Komisija ne može drugu licitaciju održati, nego će opet Vijeće donositi odluku o tome. Kao komisija mogu predložiti ako je neuspjela licitacija da se izvrši neposredna prodaja, ali Vijeće može donijeti tu odluku, ne može komisija. Za razmišljanje to zavisi od stranke da procjenjuje za šta mu treba razmišljanje, jer možda treba da se konsultuje direktor i to može biti na zahtjev. Ako ne nema zahtjeva rečeno je pet minuta od prve do druge. Govorili ste kada će sljedeća, a sljedeću opet Vijeće određuje hoće li biti ili neće. Kada se licitacija završi komisija dostavi izvještaj Vijeću i Vijeće cijeni te razloge. Možda u komisiji smatraju da je bezuspješna i da nema potrebe da se mijenja to stanje, a opet je na Vijeću da donese odluku, a ne na nama. Koliko treba od prve do druge to je do Vijeća kada će drugu. Zamjena nekretnina je zakonom propisana, međutim mi smo htjeli da napravimo red. Od sad su ovi slučajevi i više ne može, jer je bilo svakakvih zahtjeva za razmjenu i Vijeće je donosilo i bilo je validno, jer nismo imali odluke koja je ograničavala. Sada kada ima odluka, sada može i pravobranilac kada daje mišljenje da kaže da nije u skladu sa odlukom vaša zamjena. Ovo je novina, a odluka je neposredna i opet Vijeće donosi i uglavnom sve počinje sa Vijećem i završava sa Vijećem u smislu odluka. Konačano provođenje ugovora zahtijeva da je notarski obrađen i pravobranilac mora dati mišljenje i time je procedura završena.“*

*Dr. Ferid Konjić, predsjedavajući Općinskog vijeća: „ Ne vidim prijavljenih diskutanata i dajem na izjašnjavaње. Ko je za ovu Odluku?“*

*Glasanje: ZA – 15, PROTIV – 0, UZDRŽANIH – 0.*

**Ad.2. Razmatranje i usvajanje prijedloga Odluke o naknadama za izdavanje i korištenje podataka adresnog registra Općine Doboj Istok**

*Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.*

*Emira Karić, predsjednica kluba vijećnika SDP: „ Svakako da i ova Odluka ima zakonsku osnovu i naravno je prihvatljiva. Samo što bi po meni bilo pravilnije, ali naravno ne kažem da mijenja kontekst, kod tarifnih brojeva i nabiranja iznosa naknade jedinicu mjere staviti u zagradu ili poslije crtice, a ne koristiti izraz po. Znači po objektu ili granica naseljenog mjesta po poligonu, granica naselja/ ulice po poligonu. Čitajući dolazi do određenog nerazumijevanja, međutim meni je ovaj broj 4. u tarifnom broju 2. kućni broj – točkasti objekat što znači da je točkasti objekat jedinica mjere, a tako je moglo biti i gore navedeno. Ne mijenja kontekst, ali bi po meni bilo itekako pravilnije.“*

*Dr. Ferid Konjić, predsjedavajući Općinskog vijeća: „Ima li još diskutanata? To su tehnički detalji koje nam treba neko lektorisati. To je vjerovatno od negdje prepisano. Dajem na izjašnjavanje. Ko je za ovu Odluku?*

*Glasanje: ZA – 15, PROTIV – 0, UZDRŽANIH – 0.*

**Ad.3. Razmatranje i usvajanje prijedloga Odluke o dodjeli mandata novom članu Savjeta MZ Stanić Rijeka.**

*Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovu Odluku?“*

*Glasanje: ZA – 15, PROTIV – 0, UZDRŽANIH – 0.*

**Ad.4. Razmatranje i usvajanje Izvještaja o radu Zajedničkog pravobranilaštva Čelić, Teočak, Sapna i Doboj Istok za 2018. godinu.**

*Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“*

*Mehmed Mehinović, predsjednik kluba vijećnika SBiH: „Nekako mi je drago kada ima gostiju i kada je puna sala prijatnije se osjećam. Čitao sam sve zapisnike u posljednje vrijeme, pa sam vidio koliko sam bio dosadan zato ću tehničkog sekretara poštediti i nastojat ću da budem što konkretniji i što jasniji. Jedan od izvještaja za kojeg ja mogu reći da je jasan, transparentan, informativan, konkretan i da ga je zadovoljstvo čitati. Kada kažem informativan u ovom izvještaju možemo naći sve što ne možemo naći u drugim izvještajima koje mi dobivamo na Općinskom vijeću. Pogotovo govorim za vijećnike koji su opozicija. Zaista jedna slika općine koja ne treba da zabrinjava da pravobranilaštvo radi svoj posao kako treba, pogotovo ako znamo da je obaveza pravobranilaštva da pravno cijeni zaključeni ugovor, te u slučaju kada ocijeni da je pojedini ugovor ništavan dužno je podnijeti tužbu za utvrđenje ništavosti, a u slučaju da ugovorena cijena ne odgovara prometnoj vrijednosti, podnijeti tužbu za poništenje ili izmjenu takvog ugovora. Znači otpilike da sve što se radi u Općini da je transparentno javno i da nije bilo ovakvih slučajeva i jednostavno ne može čovjek da ne izađe i ne pohvali i da kaže da izvršni organi rade kako treba i da pravobranilaštvo nije imalo problema za nikakvu intervenciju. Jednostavno ja sam zadovoljan sa svime što ima ovdje osim ovih, a to je uobičajeno da se svugdje vode pojedine tužbe, predmeti na sudu itd. Vidi se da je pravobranilaštvo dobilo dosta ovih sporova i da nema nekih posebnih problema. U tom pogledu što se mene lično tiče i kluba vijećnika SBiH dajemo odličnu ocjenu ovom izvještaju i želimo da nastavi rad ovakav kakav je i do sada bio.“*

*Emira Karić, predsjednica kluba vijećnika SDP: „I ja bih zaista nešto afirmativno. Ko je čitao sudske spise može slobodno reći da je to teško štivo, međutim ovo što vi nama predstavljate u nekoj skraćenoj verziji, ali vrlo prihvatljivoj verziji za razumijevanje. Ja vam se ovim putem i zahvaljujem. Ono što mogu samo primijetiti, koristit ću naziv jedne knjige Na zapadu ništa novo, jer smo ovakve predmete čitali i u prošlim informacijama. Možda još nešto da primijetim da nema uposlenika i bivših uposlenika i onih koji*

su trebali biti uposlenici ovaj bi izvještaj možda bio na 3 – 4 stranice, ali tako je kako je. Uglavnom hvala vam na razumijevanju teksta ovakve vrste izvještaja.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavaње. Ko je za ovaj Izvještaj?“

Glasanje: ZA – 14, PROTIV – 0, UZDRŽANIH – 1.

#### **Ad.5. Razmatranje i usvajanje Izvještaja o radu komunalnog inspektora za 2018. godinu.**

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Malo ću se dotaknuti nekih stavki u izvještaju gdje kažete da je ponovo najveći izdatak za Općinu za rasvjetu u odnosu na druge općine. U potpunosti se slažem. Naveli ste dva razloga veća upotreba LED i štednih svjetiljki i lično učešće građana bi to i riješilo. Nadam se da će se u bližoj budućnosti dočekati ta realizacija. Pričali smo puno na ovu temu i sad samo ostaje da se nešto i realizira. Kažete da je procenat uključenosti domaćinstva u odvoz smeća u Brijesnici Maloj 36%, a najveća je u MZ Stanić Rijeka koja iznosi 68%. Zaista bih ja pohvalila ovu Mjesnu zajednicu, a što se tiče Brijesnice Male vidim da tu jedino mogu izvući ovi privrednici, pa da se napravi neki balans, jer poprilično ima privrednika koji su 41. Uklanjanje snijega i leda - što se tiče svih firmi koje su zadužene za održavanje postojećih puteva uredno i redovno održavaju zadate dionice. U potpunosti se slažem, jer za sada sve jako dobro funkcionise. Da bi još bolje funkcionisalo smatram da bi se mogao razmotriti moj prijedlog sa javne rasprave o budžetu da se ipak određena sredstva daju i mjesnim zajednicama koje bi takođe našle rješenje za čišćenje onih puteva koji se ne čiste od strane navedenih preduzeća. Mislim da to nisu velika sredstva, a ta bi sredstva itekako pomogla i samim domaćinstvima, odnosno ljudima koji ili idu na posao ili idu u školu itd. Kažete da je komunalni inspektor preko Službe za prostorno uređenje predložio Općinskom vijeću nacrt Odluke o izgradnji, upravljanju i održavanju groblja – mezarluka na području općine. Mislim da se s pravom pitamo zašto do sada nije došao na dnevni red prijedlog ove Odluke kada znamo da je nacrt prihvaćen od većine. Malo se rasteglo kada je u pitanju ta problematika. Izvještaj je sadržajan i jasan i ja to ne mogu kriti, ali ću biti suzdržana, gospodine komunalni inspektore, samo iz razloga što vi, Enese, po zakonskim regulativama ne možete biti komunalni inspektor. To je navedeno od agencije, da možete to raditi samo kao volonter, jer sam razumjela da nemate pravo na prekovremeno plaćanje.“

Hasan Hasančević, predsjednik kluba vijećnika SDA: „Ja ću samo o izvještaju, jer stvarno stanje na terenu govori da je to tako, nemojte da balansiramo. Zamolio bih nas vijećnike da svi utičemo na komšije, jer nemamo drugog rješenja nego da prijavljujemo ko nije u odvozu smeća, ko baca smeće. Počeli su građani malo drugačije da razmišljaju i savjesnije, tako da u tom pogledu mi poradimo kada odemo ocu, materi, bratu, sestrama, tećićima itd. Nema balansa, uvažena kolegice, ako je 36, je 36% i nije problem, poznati su razlozi zbog čega je to tako. Neko doživljava i općinu i komunalno preduzeće kao nešto imaginarno, neko ne. Mi moramo pohvaliti i Općinu koja plaća deponiju koju mi nemamo na svom području i hvala Bogu pa je nemamo. Trebamo u budućnosti razmišljati malo više i sebe po džepu pa da svi uđemo u taj odvoz smeća i da se uključimo i preko udruženja građana i preko mjesnih zajednica i kolektiva gdje radimo i djelujemo. Čišćenje snijega ne bi bilo, uvažena kolegice, da se prihvatio vaš amandman da se skine određena cifra komunalnom preduzeću. Da malo osvježimo pamćenje, jer bilo bi to puno lošije. Ja koliko se sjećam vašeg prijedloga na javnoj raspravi da se skine, a ne da se da mjesnim zajednicama, nego da se da nekom drugom. Bitno je otprilike da se mi uklapamo u neke standarde i čak smo iznad standarda drugih općina u smislu odvoza smeća i čistoće. U zadnje vrijeme pojavile su se ponovo neke divlje deponije, čak kraj nekih javnih puteva. Do sada smo imali dobru saradnju sa policijom da i na tom dijelu radimo i oko dojava i oko „ganjanja“ ljudi koji bacaju smeće. Znači moramo svi više poraditi na tome i ne bakćati se da li neko radi kao vršilac dužnosti i je li u skladu sa propisima ili nije, nego da se konkretnih stvari držimo.“

Emira Karić, predsjednica kluba vijećnika SDP: „Na početku potpisujem neke stvari iz prethodne diskusije. Ovo je bila samo mala šala vezano za balans, da viditi koliko privrede ima u Brijesnici Maloj.

*Kada se nastupa bahato onda bi trebalo da ovdje stoji 100%, a u Maloj Brijesnici 36%, pa da onda ja raspravljam zašto je u Brijesnici Maloj 36%. Ja ovdje nigdje ne vidim 100% mada trend rasta postoji i to je ono što je dobro. Ništa ne može preko noći to zna i sam v.d. komunalni inspektor. Smatram da ćemo dostići jednu jako lijepu cifru priključka za smeće. Naravno to ide putem određenih edukacija, ali i samo će stanovništvo vidjeti da drugačije ne može. Tako da je samo pitanje vremena kada ćemo dostići tu cifru. Mislim da kod Brijesnice Male postoji problem uskih sokaka, pa je njima teško se priključiti, ali kada se i to riješi potpisujem da će cifra biti veća. Stvarno nije u redu da mi govorite da se ne bakćem oko zakona. To nije u redu, nije profesionalno od vas kao vijećnika. Znači ono što smatram i što pročitam da je zakonska regulativa imam pravo za ovom govornicom reći. Šutjela sam tri sjednice, sjednice se završavale za 4 minuta, ali kao čovjek smatram da nije u redu takav rad, bez obzira što predsjedavajući govori svi ste vi došli da dignete ruke ili da ne dignete. Ne, mi ovdje konkretno raspravljamo, pa ako može da pomaknemo neki problem, ako ne može da ga ostavimo na istoj poziciji. Nije prikazano transparentno čišćenje i koliko je to novaca od strane JKP „Čisto“. Ja sam takođe pročitala da ni jednu fakturu Čisto ne daje Općini. Tako sam pročitala, isto agencija rekla. Zato ja mogu kalkulirati amandmanima da li treba smanjiti, da li treba povećati, jer ne znam koliko se potroši, jer nije transparentno.“*

*Safet Smajilbašić, vijećnik SBiH: „ Prvi puta se javljam i sve vas selamim i pozdravljam. Lijepo je ovdje komunalni inapektor naveo koje su njegove nadležnosti i to je u redu. Ja ću se osvrnuti malo na ovu našu javnu rasvjetu gdje se konstatuje da smo 2017. godine imali 1462 rasvjetna tijela, a 2018. godine smo imali 1484, odnosno 22 više. Istovremeno inspektor je i prošli puta kada smo imali izvještaj, a i ove godine, dao prijedlog mjera kako bi se ova cifra troškova koji su bili prošle godine negdje 90.000 KM smanjila. Volio bih da znam ova 22 nova rasvjetna tijela je li to LED rasvjeta ili je ona klasična kao što smo i do sada imali. Nije mi žao ovih para 90.000, jer to je jedino što svaki građanin Doboj Istoka koristi direktno svaki dan ili svaku noć. Ja vjerujem da će ti troškovi biti još veći ukoliko ne budemo poduzimali mjere koje predlaže komunalni inspektor. Kada idemo našim sokacima i putevima kod nas nema kakvih više stubova nema. Telekom, javna rasvjeta, sada ima i ovih privatnih emitera i sasvim je u pravu komunalni inspektor i nemojte me pogrešno shvatiti, ali većina naših stubova su ko „pijane ustaše“ jedan na lijevu, drugi ja desnu, treći na sjevernu, četvrti na južnu stranu nagnuti. Morali bi iznaći mogućnost i pomalo rješavati i taj problem, jer nema kakvih više kablova nam ne visi po vazduhu od tih stubova i naša infrastruktura time je dovedena u pitanje, a na kraju krajeva to ružno izgleda. O pijaci i odvozu smeća ne bih govorio, niti o strukturi privrednih subjekata koji su potpisali ugovore, odnosno fizičkih lica. Ovdje vidim da su obaveze po ovim poslovima koje Čisto obavlja 30.000 KM. To nije mala para i volio bih znati strukturu tih potraživanja i šta je tu naplativo, nije naplativo, koliko je naplativo i koliko nije naplativo. Što se tiče nadzora nad mezarlicima vi znate da je to jedan od bolnih problema Doboj Istoka i to smo svi konsultovali. Na jednoj od sjednica Općinskog vijeća prošle ili pretprošle godine mi smo donijeli nacrt odluke i bilo je to na javnoj raspravi i poslije javne rasprave sve je stalo. Vjerovatno smo tek tada shvatili sa kakvim se problemima susrećemo što se tiče te problematike i nismo išli nešto više da radimo, bar ja nisam upoznat po tom problemu. Ja bih podržao ovaj izvještaj komunalnog inspektora samo da nije na prvoj stranici v.d. komunalni inspektor Enes Bećirović, što po meni opet kao i prošle godine što sam govorio, nije u skladu sa zakonom.“*

*Kemal Bratić, općinski načelnik: „ Ja bih zamolio vijećnike da ne gledaju to po mjesnim zajednicama, jer ste vi općinski vijećnici, a ne vijećnici mjesne zajednice. Ono što neko reče bitno je da i taj odvoz smeća ide naprijed. Nažalost ide veoma sporo i ja se nadam u narednom periodu da će to ići bolje. Ja sam čak razmišljao da Vijeće donese određenu odluku tipa da se građanima neće udovoljiti neka njihova potraživanja ukoliko nije korisnik, kao što i policija radi da ne možete registrovati vozilo ako niste platili kaznu. To je očito jedini način. Vi znate da smo mi nedavno imali i fizičkih i pravnih lica koji nisu potpisivali ugovore, ali sada je malo bolje. Moje mišljenje je da je to na neki način solidno u odnosu na okruženje. Opet ću ponoviti, hvala dragom Bogu da nemamo deponije kao što imaju neke općine. Po meni to su divlje deponije i Alah sam zna kada će se to riješiti i na koji način će se riješiti te ogromne količine otpada koje voze ne samo naša općina nego i druge općine. Što se tiče čišćenja takođe smatram da mi poprilično jeftino rješavamo taj problem. Ako uzmemo da je nekakva rentabilna cijena čini mi se 1600 – 1700 KM po kilometru, mi imamo 30 – tak kilometara i kada se to stavi na papir to izade dosta manje. Naravno ove godine sam i ja bio nezadovoljan, čak sam i ružno reagovao, međutim kada saslušamo druge općine i vidimo kako je u drugim općinama, mi moramo na neki način biti zadovoljni. Može to uvijek bolje i kada god se kaže da ne može, ja smatram da može. Trotoari - malo je tu bila*

tehnička podrška tako da mi moramo, naravno u saradnji sa komunalnim preduzećem, razmišljati o tehničkoj pojačanosti njihove operative koja bi popravila i te uslove. Hasan je rekao jednu lijepu rečenicu mi moramo svi djelovati i na komšije i na prijatelje i na naše sugrađane da potpisuju taj ugovor. Naravno uz neko vozilo koje će moći ući u te sokake, a da li će to biti traktor ili neko manje vozilo, jer vidio sam u nekim općinama da imaju male kamiončice i mogli bi u svaku uličicu ući. Razmišljao sam da Vijeće donese odluku da ta sredstva damo mjesnim zajednicama, sva ova sredstva koja mi koristimo da damo mjesnim zajednicama po broju kilometara. Vjerujte da to ne bi riješilo probleme. Mi bi skinuli sa sebe na neki način odgovornost, ali ko garantuje da bi to bilo bolje. Mi ta sredstva izdvajamo i nama je svejedno ko će to uraditi. Tako da mi trebamo biti makar malo zadovoljni, a moglo je to bolje i ove godine. Ova je godina bila najlošija što se tiče čišćenja, ali bile su obilne padavine. Jedna Austrija je blokirana, jedna Njemačka je blokirana, tako da mi na neki način trebamo biti zadovoljni. Najbitnije je da radimo, kao što je uvažena vijećnica rekla, a onda do svijesti je građana. Čovjek zna sve kritikovati, svakog živog kritikuje, ništa mu ne valja, ne valja mu država, ne valja mu ovo, a septičku izveo u kanal koji prolazi pored puta. Znači raditi što više na osvještavanju načih građana da napredujemo i u tom pravcu i onda će, ako Bog da, biti još puno puno bolje.“

Dr. Ferid Konjić, predsjedavajući Općinskog vijeća: „Ima li još diskutacija? Ima li inspektor šta dodati? Ako nema, dajem na izjašnjenje. Ko je za ovaj izvještaj?“

Glasanje: ZA – 9, PROTIV – 0, UZDRŽANIH – 6.

#### **Ad.6. Razmatranje i usvajanje Izvještaja o radu savjeta mjesnih zajednica za 2018. godinu.**

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Mehmed Mehinović, predsjednik kluba vijećnika SBiH: „Ubijeden sam ko god od nas izađe za ovu govornicu da će reći svaka čast predsjednicima savjeta mjesnih zajednica, predstavnici mjesnih zajednica radili ste dobro i nastavite raditi tako i razići ćemo se. Međutim, mislim da nije dovoljno. Čitao sam svoj prošli govor kada su u pitanju izvještaji mjesnih zajednica koji je bio na 2,5 stranica, a sada ću ga skratiti konkretnije. U svim izvještajima stoji da je osnovno nedostatak sredstava za njihov efikasniji rad. Mogu vam reći da je to i na nama vijećnicima kod donošenja budžeta da otprilike usmjeravamo da ljudima makar apel taj ispunimo. Zna se ko može uticati na to kod kreiranja budžeta da izvršna vlast povede računa i da vidi da se poveća taj dio sredstava. Naravno podržat ćemo to mi kao vijećnici da se ljudima stavi na raspolaganje više sredstava, da imaju više manevra i da više stvari mogu oni riješiti, jer oni neposredno sa građanima učestvuju u rješavanju određenih problema. Naravno, analogno tome jasno je meni da Općina preko svojih linija interveniše u asfaltiranju, u rješavanju infrastrukturnih i drugih problema, o rasvjeti smo pričali itd. Međutim ipak bi trebalo malo više sredstava ostaviti ljudima na raspolaganje da mogu rješavati određene stvari. Naravno neko će reći bio si u poziciji što to nisi tako rješavao, a ja kažem da je pameti do kadije kao od kadije, bilo bi to u redu. Kada se radi o izvještajima, mogu vam reći da su izvještaji odlični. Ako bih ja cijenio Stanić Rijeka i Lukavica Rijeka prednjače. Zaista fantastični izvještaji, čini mi se da ih ni ja ne bi mogao bolje napraviti, a znam izvještaje raditi. Ljudi rade volonterski i ja mislim da im samo možemo pomoći kod kreiranja budžeta da im damo određena sredstva da mogu rješavati određene stvari. Ako govorimo o izvještajima čudi me samo da je moja Velika Brijesnica solidan izvještaj napravila, međutim nema finansijskog izvještaja, što me zaprepastilo. Znam da tu nema nekih sredstava, ali sve ostale mjesne zajednice imaju, a da ne bi rekli izašao je diskutovati, on iz Brijesnice, a neće da kaže da je to to. Čudi me da li je to neka tehnička greška ili namjerno nije poslato ili je bojkot itd. Međutim ima jedna i radosna vijest u svim tim izvještajima, što mene posebno raduje, jeste da su svi do jednog rekli da je dobra saradnja sa izvršnom vlasti, da dobro sarađuju. Ja želim da se ta saradnja nastavi u još boljem obimu da ne bude nikako gora, da bude bolja. U svoje ime i u ime kluba Stranke za Bosnu i Hercegovinu čestitam svim predstavnicima mjesnih zajednica, jer mislim da su dobar posao uradili, ono sa čime su raspolagali i koliko su mogli. To se zove društvena odgovornost i da nastave sa tom društvenom odgovornošću i da nastave dobru saradnju, kako to oni kažu, sa izvršnom vlasti.“

Emira Karić, predsjednica kluba vijećnika SDP: „ Mi nikada nismo ni predlagali niti usvojili neki poseban obrazac o načinu pisanja izvještaja bar kada je u pitanju rad savjeta mjesnih zajednica, tako da i mi po nekoj ličnoj percepciji i ličnom nahodjenju, odnosno na osnovu onoga što smo pročitali i dajemo



svoje diskusije. Da nisam vijećnik samo jedne mjesne zajednice, a kako bi mogla biti, jer previše smo mali da bi se dijelili na vijećnike po mjesnim zajednicama. Iz svoje percepcije ću reći da je izvještaj Savjeta MZ Brijesnica Velika, po meni, najbolje urađen. Obrazložit ću i zašto. Zato što ste konkretno navodili datume. Znači datumski su se mogle propratiti te vaše aktivnosti i vidimo da su aktivnosti tekle tokom cijele godine. Takođe ono po čemu bih izdvojila ovaj izvještaj je sljedeće, mada niste rekli koliko, ali kažete na zahtjev građana i finansijsku pomoć općine Doboj Istok Mjesna zajednica je uradila nasipanje puteva po pravcu tom i tom, zatim učestvovali su dijelom građani Mjesne zajednice i općina Doboj Istok, realizacija projekta ukoritavanja rijeke obezbijedila Kantonalna uprava civilne zaštite i općina Doboj Istok. Tako da sam ja dobila neku viziju kako je se to radilo i od kojih sredstava se to radilo. Takođe što se tiče tog finansijskog izvještaja ja bih radije da on ide nekoj službi, da mi ne dobivamo taj finansijski izvještaj, nego da ga služba jednostavno prekontrolira, jer meni je to malo podosadno čitati, a vjerujem da je tu sve u redu. Zašto kažem da bi bilo dobro istaknuti, jer Stanić Rijeka u svom izvještaju govori Mjesna zajednica uradila to, to i to, a znam da je to sve bilo uz pomoć Općine ili Kantona. Kažem za izvještaj Stanić Rijeka trebalo je navesti ko je sve učestvovao u tom projektu. Takođe kada je u pitanju izvještaj MZ Klokočnica, dobar je izvještaj, ali ima i fina finansijska sredstva sa kojima raspolažu. Čestitam im i daj Bože da ima još više tih sredstava, jer transparentno je sve ovdje napisano. Što se tiče Brijesnice Male izvještaj je štur, znači prešla sam sve, Lukavica Rijeka isto jako dobar izvještaj i tu se spominje kako su pomoću traktora očistili neki put. Upravo sam o tome govorila, nisam govorila da sredstva za čišćenje puteva pređu na mjesne zajednice, nego da se samo nekom finansijskom injekcijom pomogne mjesnoj zajednici u čišćenju koje ne čiste zadužene firme. Na to sam mislila, a ne da se sva sredstva prebace. Što se tiče izvještaja o radu Savjeta MZ Brijesnica štur je, međutim ja zaista moram ovdje pohvaliti i zahvaliti se na ustupljenim prostorijama. Itekako su nam olakšali i hoću da kažem da je dobro imati takve objekte i naravno svi smo tu da jedni drugima pomazemo, ali spasila je skoro jednu školsku godinu upravo Mjesna zajednica Brijesnica Mala, naravno i vrtić, a to ću posebno kada dođe izvještaj. Nismo mi samo koristili prostor, jer znate kako je kada nekog pustite, pa vam i ormari koriste, pa i telefone, pa smo koristili i printere i kompjutere, snalazili smo se. Dobra je ona veća prostorija u kojoj je mogla biti i zbornica itd. Zaista su bili na neki način onemogućeni, sekretar i predsjednik, da redovno i fino svoje poslove rješavaju. Kažem hvala, mi smo se uselili u nove prostorije i dobro nam je sada.“

Selmin Karić, vijećnik SDA: „Uvaženi predsjedavajući, zamjeniče, načelnice sa saradnicima, kolege i kolegice vijećnici, uvaženi gosti esalamu alejkum i dobar dan. Kao što su i svi prethodnici rekli sve pohvale svim savjetima i predsjednicima savjeta mjesnih zajednica. Stvarno velika zahvala svima njima što su se prihvatili uopšte to da rade, jer su oni prvi na udaru kada su u pitanju problemi građana. Naravno ono što mogu riješiti, oni riješe, a ostalo prosljeđuju ili Općini ili u saradnji sa nevladinim organizacijama te stvari rješavaju. Kada su u pitanju finansijski izvještaji, Vijeće od savjeta mjesnih zajednica traži samo izvještaj o radu. Mi smo nekad u prethodnom periodu, ne znam da li pretprošle godine imali inicijativu da idu i finansijski izvještaji, ali se to još nije desilo, tako da su oni obavezni da dostavljaju samo izvještaje o radu. Tako je i do sada bilo i zato vjerovatno Brijesnica Velika nije posebno ni dostavila finansijski izvještaj. Ono što bih ja htio sugerisati, a čini mi se da je Lukavica Rijeka u pitanju, nisam primijetio kod ostalih, kada radite analizu finansijskog izvještaja da on bude u skladu sa onim finansijskim izvještajima koji su urađeni i koji su predati u AFIP. Kod vas je u finansijskom izvještaju bilans uspjeha višak prihoda nad rashodima 1.036 KM, a po vašoj analizi je negdje oko 4.500 KM. Znači da o tome malo povedete računa. Kada radite svoju analizu uzmete tamo početno stanje gotovine u blagajni i na računu i kada se to sve sabere višak rashoda na prihodima bude veći nego što je po finansijskom izvještaju. Sve je po mom mišljenju dobro urađeno. Kada radite tu vašu analizu vi možete tamo staviti primici i izdaci, da ne bude prihodi i rashodi, pa višak prihoda nad rashodima. U tom kontekstu. Toliko od mene i ja se još jedanput zahvaljujem i odličan posao su svi uradili.“

Safet Smajilbašić, vijećnik SBiH: „Nikada nije bilo lako raditi sa narodom, sa rajom, pa neće biti ni danas, neće biti ni sutra i iz tog razloga svi ovi ljudi koji se uhvate u savjetima mjesnih zajednica u koštac sa problemima koje trebaju da rješavaju, treba im na neki način čestitati, jer nije to lako. Ja sam gledao izvještaje svih mjesnih zajednica i nisu to neka Bog zna velika operativna sredstva, a vjerovatno ima mnogo više problema koje trebaju da rješavaju sa tim sredstvima. Ja ću se, kao i prošli puta, zadržati više na izvještaju MZ Klokočnica i sugerisati neke stvari. Po ovom što sam ja vidio prihodi u prošloj godini u MZ Klokočnica su bili negdje oko 155-156.000 KM. Ako izuzmemo sredstva koja oni namjenski dobivaju za javnu rasvjetu, ako izuzmemo priloge građana za asfaltiranje puteva i učešće u izgradnji rasvjete i

donacije građana za odlazak na kotu Mačak, što iznosi negdje oko 95.450 KM, znači da su operativni prihodi MZ Klokočnica negdje oko 60.000 KM. Ako znamo da u MZ Klokočnica imamo sekretara MZ koji je profesionalno lice i ako znamo da imamo 9 članova Savjeta MZ i predsjednika Savjeta MZ, troškovi ovdje bar što sam vidio, a nisam vidio šta je sa Savjetom, odnosno predsjednikom Savjeta, ali u tabeli 2. ima taksativno navedeno za sekretara, a pretpostavljam da je to sve ukupno, negdje oko 21.000 KM godišnje. Nije to mala svota. I ako sada od ovih 60.000 KM uzmemo 21.000 KM, manevarski prostor oni imaju 39.000 KM, sportski klubovi, sportske aktivnosti 10.000 KM, Savjetu MZ ostaje 29.000 KM da rješava ove probleme koje treba da rješava na nivou MZ. To je jako malo sredstava za ovoliku mjesnu zajednicu, mada i ono što sam vidio u 2018. godini su najviše i trošili sredstva za infrastrukturu na puteve, na asfalt, na rasvjetu itd. Moj je savjet, moje je razmišljanje da bi Savjet MZ Klokočnica trebao, da ne bi postali samo sebi svrha, smanjiti sa 9 na 5 i dobro razmisliti oko tehničkog sekretara, jer iz godine u godinu vidim da se ovi prihodi sve više i više smanjuju, jer ne bi bilo dobro kada bi Mjesna zajednica postala sama sebi svrha.“

Hasan Hasančević, predsjednik kluba vijećnika SDA: „ Neću puno o izvještajima. Neko je spomenuo patriotizam u nekoj rečenici, na nekoj tački dnevnog reda i treba da znamo da smo svi mi mjesna zajednica. Svi smo mi dio tih mjesnih zajednica i kada jedan dio ne funkcioniše ili jedan vuče tamo, jedan ovamo, nije dobro. Ja sam imao čast i zadovoljstvo da obnašam dužnost predsjednika MZ Klokočnica i u svom radu sam nailazio na razne probleme. Međutim nezahvalno je tim ljudima da rade tu gdje rade, bez obzira što neko ima tih 20 KM ili za neke troškove što dolaze. Mizerija. Šta je suština rada u mjesnoj zajednici? Pogotovo ću spomenuti Klokočnicu, podružnice su maltene mjesna zajednica. Da nema Općine Doboš Istok, tako i za sve, bilo bi ogromnih problema. Ko šteta mjesnim zajednicama, ko obilazi familiju ili po bilo kojoj drugoj osnovi, vidi da su naše mjesne zajednice pretvorene u gradilišta. Mene puno ne interesuje i ne sikira odakle su pare došle i kako su došle i ko ih je donio. Kada pričamo trebamo biti realni. Ako MZ Mala Brijesnica, aferim koristi se zgrada za školu i sada je lijepo u školi u Maloj Brijesnici, super nam je i bajno, a trebali bi kazati i ko je namakeo sredstva za školu. O principu pričamo, da ne vozimo na jednu ili na drugu stranu. Ja znam neki će se ovdje malo naježiti, neki ovako, neki onako, ali u principu svako ko donese 1 KM za razvoj mjesne zajednice treba mu orden dati, a da ne govorimo nešto drugo. U najmanju ruku kada se izađe za govornicu treba pohvaliti. Hvala predsjednici mjesnih zajednica, članovi savjeta, hvala općinski načelnice sa svojim rukovodiocima što izlazite u susret mjesnim zajednicama. Oni nama pravdaju sredstva od 4.000 i nešto KM za administrativne stvari. Znači to je to i linearno je svima isto. I onom ko ima tehničkog sekretara u stalnom radnom odnosu i ugovorom o djelu itd. Oni su jedna produžena ruka općinskih službi i organa koji rade na terenu i nije lahko. Kada bi sredstva prebacivali mi bi ovdje zakrtili kome koliko više i kako da bi na drugi način prebacivali. Malo da razmislimo kada odemo kući. Ima načina kako se raspoređuje PDV na višim nivoima po broju djece, po broju stanovnika, teritorija, kvadrati, ovo, ono i sebe bi doveli u poziciju da moramo ovdje raspravljati po raznim stvarima. Ovo ide dobro, za prošlu godinu govorim, fantastično, sve mjesne zajednice su gradilišta i svaka čast.“

Kemal Bratić, općinski načelnik: „ Ja koliko znam dva savjeta mjesne zajednice imaju profesionalna lica, a ostali imaju nekakve naknade i to su oni regulisali svojim odlukama. To reguliše statut mjesne zajednice da li će biti ili neće, koliko članova itd. To je stvar savjeta, odnosno treba referendum ili zbog građana da bi se promijenila bilo koja riječ u statutu i to je ta procedura. Ja želim ovdje da idemo u drugom pravcu. Drago mi je što su sadašnji savjeti mjesnih zajednica pojačani mladom snagom i dosta ima mladih članova savjeta po mojim informacijama koji na neki način unose određene novine u modalitet rada, koji pokreću inicijative. Ja sam uvijek govorio i uvijek ću govoriti i uvijek ću podržavati svaki onaj savjet koji pokrene inicijativu da oni obezbijede marku, a mi ćemo dvije. Tako ću raditi dok sam općinski načelnik. Ja se doživljam kao predsjednik tih savjeta mjesnih zajednica, a naravno doživljam ih i kao partnere, da ne misle predsjednici da smo mi to nešto iznad, pa da nešto kontrolišemo. Ja njih doživljam kao partnere i doživljam kao ljude koji pomažu kako meni tako i vama na terenu, doživljam ih kao ljude koji imaju više dodira sa građanima, da nas usmjeravaju gdje treba da idemo i u kojem pravcu da idemo da bi saradnja bila što bolja i naravno da bi infrastruktura u mjesnim zajednicama bila što bolja. Ja tako doživljam savjete mjesnih zajednica. Mi možemo donijeti određene odluke da evo sav budžet damo njima i to je naša nadležnost da kažemo ono što je viška u budžetu da damo mjesnim zajednicama osim materijalnih troškova. Međutim savjeti mjesnih zajednica podnose zahtjeve. Predsjednici savjeta mjesnih zajednica meni svakodnevno dolaze, pogotovo iz Lukavice

*Rijeke donose zahtjeve, iz Velike Brijesnice, iz Klokotnice i ljudima hvala. Ne trebamo mi njih sada ovdje žaliti, jer su oni dobrovoljno išli na listu, dobrovoljno izabrani za vijećnike savjeta mjesne zajednice, isto kao i mi. Naš zadatak je da to radimo, odnosno naš zadatak kao općinske strukture je da pomognemo tim ljudima na terenu. Želim da se zahvalim svim savjetima mjesnih zajednica na jednoj korektnoj saradnji, na razumijevanju, jer dolazilo je do određenih momenata kada smo rekli da ne možemo sada ući u tu proceduru, sačekajte malo da bude nekakav bolji trenutak. U svakom slučaju ja sam zadovoljan sa njihovom saradnjom, bili su korektni, pogotovo u 2018. godini. Kažem posebno mi je drago što su savjeti mjesnih zajednica podmlađeni, ali naravno ima i ovih starih vukova kao što je naš Medle i drago mi je da naša omladina ulazi i da gleda kako to treba da ide. Čestitam im, jer su po meni svi savjeti mjesnih zajednica imali jednu uspješnu godinu. Naravno ono što mogu obećati kao općinski načelnik da će i u narednom periodu imati punu podršku od mene kao općinskog načelnika, a nadam se i vas kao Općinskog vijeća.“*

*Emira Karić, predsjednica kluba vijećnika SDP: „Ja sam i počela svoju prethodnu diskusiju, kada je u pitanju ova tačka dnevnog reda sa malo većom pohvalom izvještaja MZ Brijesnica Velika upravo iz razloga što je navedeno šta finansiraju građani, šta finansira Općina i imali smo Kantonalnu upravu civilne zaštite. Tog kod izvještaja u Stanić Rijeci nemamo. Navedeno je utopljavanje ambulante, ko? Mjesna zajednica? Ulaganje i izgradnja kanalizacione mreže u naselju, ko? Ne vidim. Nasipanje i popravka lokalnih puteva. Zato sam pohvalila da ne dođe do ovakvih rasprava. Kada je u pitanju izvještaj MZ Brijesnica Mala oni su trebali, naš predsjednik i sekretar Amir, u izvještaju da kažu u asfaltiranju puta ko je učestvovao. Takođe rekonstrukcija škole, ko je učestvovao? Meni Hasane, problem nije i ja ću svaku sjednicu započeti hvala TIKI, hvala Općini što je ušla u projekat rekonstrukcije škole, jer smo zaista riješili jedan veliki, a možda i gorući problem. To sam rekla i na Kolegiju i zahvalila se načelniku i rekla sam načelniku da svugdje i gdje god kojeg roditelja vidim upravo o tim stvarima pričam. Nije u redu Hasane da ljudima koji nisu bili na Kolegiju prezentiraš kako ja pohvaljujem MZ, jer nam je ustupila, a mora i to biti neki čin ili gest lijepog ponašanja, bar od strane mene.“*

*Selmin Karić, vijećnik SDA: „Ako nas nešto interesuje, a nije u ovim izvještajima, mi možemo tražiti od savjeta i predsjednika da nam dostave pismeno. Kolegice, ako smatramo da nisu izvještaji sveobuhvatni možemo tražiti da oni nama dostave pismeno te stvari, odnosno konkretno šta je urađeno kao što je Velika Brijesnica dostavila da tako i ostali. Znači taksativno da navedu. Vidim da je u Maloj Brijesnici bilo investicija 33.625 KM i svaka marka koja se investira stvarno je za pohvalu, jer 33.625 KM nije mala cifra. Mi možemo tražiti, ako se ostali slažu i ako ima potrebe da nam i ostali to dostave.“*

*Kemal Bratić, općinski načelnik: „Moja diskusija je u dobroj namjeri da me neko krivo ne shvati. Nema krupnije investicije na općini Doboj Istok gdje nije investitor općina Doboj Istok. Znači nema je i ne može biti. Ne može se zaobići općina. Neko volio općinu ili ne volio, volio načelnika ili ne volio, ne može se zaobići. Mogu se napraviti ove manje akcije, da građani nešto skupe pa naspu, to da, ali krupnija investicija svakoj je investitor općina Doboj Istok. Da li je iz našeg budžeta, da li smo našli sredstva, to uopšte nije bitno i nema potrebe da neko dostavlja zahtjev.“*

*Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavaње. Ko je za ove izvještaje?“*

*Glasanje: ZA – 15, PROTIV – 0, UZDRŽANIH – 0.*

*Emira Karić, predsjednica kluba vijećnika SDP: „Tražim pauzu.“*

*Predsjedavajući je dao pauzu od 5 minuta.*

*Sjednica je nastavljena u 11,20 sati.*

**Ad.7. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2018. godinu.**

*Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovaj Izvještaj?*

*Glasanje: ZA – 15, PROTIV – 0, UZDRŽANIH – 0.*

#### ***Ad.8. Razmatranje i usvajanje Informacije o sigurnosti na području općine Doboj Istok za 2018. godinu.***

*Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.*

*Emira Karić, predsjednica kluba vijećnika SDP: „Takođe ću preći malo i po informaciji o sigurnosti na području općine Doboj Istok. Na prvoj stranici kažete da po sistematizaciji radnih mjesta u Doboj Istoku treba da bude 35 ovlaštenih službenika. Znači nedostaje 5 ovlaštenih službenih lica. Kako to prevazilazite? Kada bi moglo doći do popune tih radnih mjesta? Takođe kažete da obavljajući poslove i zadatke službenici Policijske stanice susreću se sa sljedećim problemima - promjena ovlaštenja. Ovaj problem nije mi baš jasan i kažete niske plate službenika. Ne znam kako funkcionise sindikat? Ima li kakvih naznaka za neka povećanja? Mi u prosvjeti smo se, hajmo reći, izborili. Nisu značajna, ali svaki pomak je dobar. Ne znam kako to reguliše sindikat kada je policija u pitanju. Dolazimo do druge stranice javni red i mir. Povećanje u narušavanja javnog reda i mira ima u odnosu na 2017. godinu, ali još uvijek nije na nekom zabrinjavajućem nivou, što je takođe dobro. Službenici policije su 34 puta upotrijebili sredstva sile i rekli ste da su to sredstva vezivanja, nije bilo upotrebe vatrenog oružja i upotrebe službene palice ili fizičke sile. Mislim da je stanje baš kako ste opisali u izvještaju zadovoljavajuće. Na strani 5. imamo tabelu o bezbjednosti saobraćaja i vidimo da vozača zatečenih bez upotrebe sigurnosnog pojasa čak 106 %, razlika u odnosu na 2017. godinu i vozače zatečene da koriste mobilni telefon u toku vožnje, tu imamo povećanje za 119 %. Ja ipak mislim da se ovdje radi o ažurnijem pristupu u radu policijskih službenika kada su ove mjere u pitanju. Takođe u dijelu o bezbjednosti saobraćaja, vi niste bili do sada prisutni, iako smo dobili neke informacije mislim da treba insistirati na tom fiksnom radaru ili barem tabla radarska kontrola. Znamo da postoje takve table, ne znam da li one po zakonu i podrazumijevaju fiksni radar, a mislim da ne, koliko možemo vidjeti u praksi. Barem da uz pomoć takvih tabli na neki način regulišemo taj saobraćaj. Tabela pokazatelj stanja kriminaliteta. Tabela pokazuje stanje povećanja po svim osnovama, ali sa znatno manjom materijalnom štetom u odnosu na 2017. godinu. Međutim meni je ovo povećanje interesantno, a to je broj učinilaca maloljetnika koji se povećao za 133 %. To mi je malo loš pokazatelj i tu je zabrinjavajuće stanje. Kažete takođe da je Kantonalnom tužilaštvu Tuzla podneseno 13 izvještaja za počinjenih 13 kaznenih djela posjedovanja i uživanja opojne droge. Nemamo parametra u odnosu na 2017. godinu, međutim ovo smatram nedovoljnim. Postoje doduše kuloarske priče, neprovjerene priče, ali mislim da je stanje poprilično loše, tako da bi se moralo i u ovom segmentu nešto više uraditi.“*

*Mehmed Mehinović, predsjednik kluba vijećnika SBiH: „ Pomno sam pročitao izvještaj za 2017. godinu i naravno zapisnik sa diskusije, jer zaista je bila široka diskusija prošle godine kada je ova materija u pitanju. Jednostavno nisam mogao da ne izađem, a i sada ću ponoviti neke riječi koje sam tada rekao, a to je da ja doživljam da Policijska uprava zajedno sa Općinskim vijećem, zajedno sa izvršnom vlašću na istom zadatku što se tiče lokalne teritorije. Naime, mi zajedno sa njima pravimo ambijent da građani žive u miru, da privrednici mogu normalno raditi bez bilo kakve bojazni da znaju da svako ko naruši javni red i mir, odnosno ko počini teže krivično djelo biti sankcionisan i po zakonu priveden tamo gdje treba biti priveden. Naravno čini mi se da je u prošloj 2018. godini ovaj segment jako dobro funkcionisao, jer nije bilo nekih problema. Ovo o čemu je moja koleginica pričala, uvažena Emira, to će se dešavati, jer neke se stvari povećavaju, neke smanjuju zbog uvođenja nekih zakonskih rješenja, nešto zbog revnosnije službe. Međutim mi nikada nismo imali Bog zna nekih problema sa radom Policijske uprave. Prošle godine bilo je malo više problema, međutim sada što se dešava ja ne bih komentarisao ništa pojedinačno osim da smo, što kaže i izvršna i predstavnička vlast, odnosno Općinsko vijeće, uradili svoj dio posla iz svoje nadležnosti. Mislim da građani na području Doboj Istoka žive bez bojazni i bez nekih posebnih problema. Dešavaju se ekcesi i pojedinačni slučajevi koji će zatalasati svojevremeno, međutim preduzimaju se određene mjere u skladu sa zakonom i to se rješava na dobar način. Ono što bih ja htio da sugerišem i kao građanin i kao vijećnik i kao čovjek koji je obnašao određene funkcije u*

prošlom periodu često sam u prilici, jer vodim unuka u školu, da sam pred srednjom školom, a ovdje je i opisano da je solidna saradnja sa Mješovitom srednjom školom. Međutim komandiru i načelnice, ako je to u granicama nekih vaših mogućnosti i organizaciono i kadrovski da bi trebalo i poboljšati tu saradnju i da se eventualno preventivno djeluje, da se razgovara sa tom djecom, pomoći ćemo i profesorima i nastavnicima, da se napravi neki plan, jer bilo bi dobro šta god preduhitrimo. Kada bi zajedno radili sa profesorima, pa da se lokalna vlast uključi kroz neka predavanja edukativna, jer mladost je i ja to sve razumijem, međutim ima od nedoličnog ponašanja, pa do vrijeđanja, a to vjerovatno ne dođe do vas, ali ja sam to vidio. Ja sam samo sugerisao i bio bih vam zahvalan, a naravno ako možemo i mi kao Vijeće da pomognemo bilo bi to dobro da vam damo određenu potporu, da taj dio posla još ažurnije uradite i šta god bi uradili i nešto preduprijedili bilo bi dobro. Inače ja ovaj izvještaj pohvaljujem i naravno dobro je urađen i što se mene tiče i kluba vijećnika SBiH mi ćemo podržati ovaj izvještaj.“

Hasan Hasančević, predsjednik kluba vijećnika SDA: „ Mislim da naši policajaci rade svoj posao, neću reći dobro, jer je i više od toga. Komandir je naveo da je materijalna situacija kao nagrada za njihov rad takva kakva jest i to neke druge institucije treba da rješavaju, a to svakako utiče na cjelokupnu situaciju u društvu. Ja neću puno o izvještaju. Svaki dan sam sudionik, odnosno učesnik saobraćaja, a nekada je to privilegija što se nalazimo na dobrom putu Doboj – Tuzla. Međutim, ako ste dobro primijetili ogroman broj teretnih kamiona je na cesti. Ja ću zamoliti komandira, načelnika ili bilo koga ko pravi izvještaje da do sljedeće godine dostavi koliko je Policijska stanica Doboj Istok zaustavila kamiona koji prevoze teret i kakve su kazne, odnosno kakve su prekršaje oni uradili i što se tiče pretovara i brzine. U noćnim satima između 5 i 8 ili između 17 i 20 sati često šetam Klokočnicom i brzina je veća puno nego što treba da bude. Takođe padaju sa kamiona određene stvari da li ugalj ili šta se više vozi. Znači zamolio bih samo da se vidi da li je to to i da imamo do sljedeće sjednice izvještaj ili informaciju koliko je kamiona zaustavljeno, šta je urađeno, je li ova priča tačna ili netačna. Statistika je neumoljiva, ona kaže to i to i ja bih zamolio komandira ako može do sljedećeg izvještaja da se to pripremi. Pohvaljujem rad policije i opet ću zamoliti sve građane da se aktivno uključe u saradnju sa policijom, jer nema drugog načina za bezbjedan način života nego saradnja sa policijom.“

Safet Smajilbašić, vijećnik SBiH: „ Pošto sam ja jedno vrijeme zarađivao kruh skupa sa službenicima Policijske stanice Doboj Istok red je da nešto i kažem. Gledajući ovu sistematizaciju radnih mjesta, ono što imamo popunjeno od strane ovlaštenih službenih lica vidim da je to negdje skoro 20 % manje nego što je sistematizovano. Nimalo nije jednostavno ni lagano organizovati rad Policijske stanice sa tako malim brojem ljudi, jer je mala Policijska stanica, a 5 službenika u većim policijskim stanicama ne bi ništa značilo. Međutim to je tako uvijek bilo. Ja se sjećam kada sam ja u Policijskoj upravi bio bilo je mnogo više ovlaštenih službenika, pa smo imali tri sektora i za saobraćaj četvrti. Žalosno je što se uvijek iz godine u godinu ponavljaju isti problemi što se tiče rada službenika kada je u pitanju opremljenost, a prije svega mislim na tehnička sredstva i na njihove uniforme, radio veza je uvijek bila problem i danas dan je problem. Ono što je po zakonu obavezno, a što nikada nismo uradili, a što je bilo i tada aktuelno, a to je prostorija za zadržavanje osoba lišenih slobode. Žalosno je, ali tu mi nismo nadležni i da policijski službenici i zvanično napišu u svom izvještaju da je nedostatak stimulativnih sredstava i da su plate službenika male. Ova ovlaštenja ovlaštenih službenih lica po Zakonu o krivičnom postupku i primjena tih zakona, odnosno odredaba tih zakona se stalno mijenjaju, kako se dorađuju zakoni i nije ni malo jednostavno ići iz jedne nadležnosti u drugu ili kada bi nadležnost uzimali ili dodaju se neke nove nadležnosti. Drago mi je kada govorimo o zakonitosti rada policijskih službenika da su samo bile dvije predstavke za godinu dana i to neosnovane na njihov rad, što je jako dobar pokazatelj. Bila je jedna inicijativa za pokretanje disciplinskog postupka što je minorno u odnosu na uslove pod kojima policijski službenici rade. Neću govoriti o javnom redu i miru, saobraćaju i kriminalitetu, to su svi drugi rekli, međutim iznijet ću svoje mišljenje. Znamo kakva je situacija u BiH, znamo da se naslanjamo na drugi entitet, kakva je situacija u Federaciji, našem Kantonu, pa i našoj Općini, ali jeste li skromni bili pa ste napisali bezbjedonosna situacija na području Policijske stanice Doboj Istok, odnosno općine Doboj Istok je na zadovoljavajućem nivou. Mislim da je to previše skromno, jer mislim da je to po meni dobro. Bilo bi mnogo bolje da nismo imali ono što se desilo u FM u Brijesnici, nažalost. Mislim da je situacija više nego zadovoljavajuća, ako nije i dobra. Uvijek sam govorio i dok sam radio u Policijskoj stanici mnogo je lakše njima raditi kada imaju građane kakve imaju u Doboj Istoku i što se tiče javnog reda i mira i kriminaliteta. Nažalost što se tiče saobraćaja vi znate da mi imamo ovaj magistralni put Doboj – Tuzla i tu nisu u mogućnosti da mnogo sprečavaju, ali mogu upozoravati i sankcionisati ili ne znam šta drugo. Ja vam

čestitam. Ustao sam samo da kažem ovo, jer sam radio četiri godine i nešto taj posao i zarađivao sa tim ljudima kruh kakav je takav je bio.“

*Selmin Karić, vijećnik SDA: „ Imam potrebu da pohvalim ovu informaciju i ono što se nalazi u njoj. Ono što je bitno kada se poduzmu određene mjere da to ima efekta. To vidimo kada je u pitanju neovlaštena sječa šume, jer u prošloj godini nije bio ni jedan slučaj, a u ranijim periodima je to bio problem na području naše općine. Ja se stvarno zahvaljujem komandiru i svim uposlenicima Policijske stanice na radu i na preduzimanju određenih mjera na sprečavanju krivičnih djela te vrste i ostalih, jer vidimo da nije bilo otuđenja putničkih motornih vozila. Znači sve pohvale.“*

*Kemal Skopljak, vijećnik BPS: „ Pošto prvi puta izlazim pozdravljam sve i selamim. Ja ću ovdje vrlo kratko, pošto su prethodnici rekli otprilike sve što treba reći vezano za ovaj izvještaj. Ovaj izvještaj je fantastično urađen i odlično. Ja bih samo postavio jedno pitanje načelniku Policijske uprave. Odjeljenje za administraciju i podršku prvo bih pohvalio, jer svi znate da u Doboj Istoku kada dođeš kod njih brzo riješiš problem bilo kada, bilo kakav. Znači od ličnih karti, pasoša, vozačkih itd. Stvarno su na nivou i rade svoj posao veoma profesionalno. Međutim CIPS u Klokočnici radi zaista u neuslovnim prostorijama, jer nemaju pristupnu rampu, a svi znamo da sve javne ustanove moraju imati po zakonu pristupnu rampu zbog naših invalida, ljudi u kolicima. Postavio bih pitanje: dali se na tome nešto radi i da li je moguće da se nešto uradi vezano bar za tu pristupnu rampu na CIPS-u?“*

*Semir Halilović, vijećnik SDA: „ Ja sam inače kao i prethodnih godina zadovoljan, ako bih mogao reći i prezadovoljan radom naše Policijske stanice generalno, da ne ponavljam one stvari koje su već neki rekli. Vjerovatno mi kao građani neke probleme uočavamo živeći i radeći, pa tako da se osvrnem na svoje utiske i ono što je od moje struke i ono što ja pratim. Kao što reče Hasan kada šetamo vjerovatno primjetimo te probleme i ono što mi se čini da je jedno vrijeme nedostajalo je stalno prisustvo radara u koje god moguće veće. Čini mi se da i kao vozač i kao pješak vidim da toga ima sve više i to je dobro. Nekada se i mi zanesemo pritisnemo po tom gasu i vjerovatno neko od nas očekuje da dobije tu kaznu za prekoračenje brzine, ali i treba tako. Na svim ovim potezima mi imamo, ako ništa drugo, ono što je po meni prioritetno to su djeca koja idu u školu, pogotovo mala djeca i svako ko prekorači brzinu treba to da plati. Neki kažu da su velike te kazne, ali kada se posmatra u kojem kontekstu se napravi prekršaj i da to može oduzeti jedan ljudski život, onda zaista kazne nisu velike i nije velik broj ni radara, ni velik broj kontrole. Svakome je karakteristično ono njegovo područje, dio u kome često živi i vjerovatno ovdje od općine, pa pravac dole do Suhopoljke često se vidi zaista i vozači mogu osjetiti kada je prekoračenje brzine. Drago mi je, jer vidim da ovdje sve učestalije dolazi ta kamera. Mnogo djece ima, ali bar u tom dijelu bar ima trotoar, ali tamo u Brijesnici od benzinske pumpe do škola, a jedan dio djece ide čak i iz Klokočnice pješke, a nema ni trotoara i zaista je važno da vozači poštuju ograničenje brzine. Ja pozdravljam koliko god puta izađe taj radar, jer to je dobra stvar. Kada je u pitanju odnos, ono što ja primijetim kao radnik, srednje škole i Policijske stanice prirodna je to saradnja. Mješovita srednja škola, Osnovna škola „Brijesnica“ i Policijska stanica smo kao jedna porodica, jer nalazimo se u jednom dvorištu. Ono što mi radimo kada promoviramo našu školu govorimo o tome da imamo jako dobru saradnju sa Policijskom stanicom, jer je prirodno to, nalazimo se u jednom dvorištu. Znači svaki poziv i bez poziva službenici jako brzo reaguju i dođu. Djeluje to i da sada neko ne misli da ima tih problema, nego preventivno je to. Svaka šetnja, svaki prolaz policajca, svaki dolazak u školu, svaka posjeta koju oni obave, predavanja koja drže preventivno djeluju na našu djecu. Možete porediti sa drugim školama zaista su kod nas problemi jako mali kada su u pitanju neke druge gradske i velike škole. Naravno da može to bolje i ja pozivam sve kao građanin, kao neko ko dovede i svoje dijete i svoje unuče itd. ako vidi neke probleme možemo razgovarati, jer uvijek se može nešto desiti što nije prijatno, ugodno, što nije primjereno učenicima, pa ni profesorima. Tu smo, možemo razgovarati i uklanjati te probleme. Mislim da je i prisustvo policajaca i Policijske stanice tu oko škole jedan od razloga što je možda u disciplini u odnosu škole prema okolini, naša škola možda jedna od najboljih da ne kažem u kom dijelu. Ja sam razumio iz diskusije uvaženog kolege Mehmeda Mehinovića da ako ima nekih problema da trebamo o tome otvoreno razgovarati. Ja sada govorim kao nastavnik, a vjerujem da je menadžment škole otvoren za svaki razgovor u svakom trenutku i da se dođe da razgovaramo o svakom problemu makar on izgledao mali ili veliki ili bilo šta drugo.“*

*Kemal Bratić, općinski načelnik: „ Teško je bilo šta reći što neko prije mene nije rekao. Drago mi je što se u diskusiju po ovoj tački uključilo toliko vijećnika i da je vijećnicima stalo do onoga što se zove sigurnost naših građana pored ovih drugih aktivnosti na obezbjeđivanju uslova za funkcionisanje života na području općine Doboj Istok. Želim da se zahvalim, prije svega, načelniku i komandiru na jednoj dobroj i korektnoj saradnji mene kao načelnika i njih kao rukovodioca u policijskim strukturama. Ono što je bitno je da svi znamo da općina ne finansira troškove kako materijalne, tako i druge izdatke u policijskim stanicama, ali rekao sam im par puta da ukoliko postoji bilo kakav problem koji će unaprijediti rad mi im stojimo na raspolaganju. To i danas kažem, naravno ako je to nekakav sitniji iznos. Ovdje imamo generalno problem i o tome sam razgovarao sa sadašnjim ministrom u tom nekakvom tehničkom mandatu, dok je bio komandir naš Hasib. Imamo problem ovdje naš geografski položaj i granicu sa entitetom koji se zove Republika Srpska i imamo problem, a takođe i dobru stranu, kao što reče Hasan, da se veći dio naselja nalazi uz magistralu. To je na neki način za razvoj privrede dobra stvar, ali trebate biti specijalac da izađete sa sporednog puta na magistralni put. Što se tiče ovih radara ja predlažem da ne tražite fiksni radar, radar treba da šeta, da je danas tu, sutra tamo, prekosutra u drugom mjestu, jer to je bolji efekat za mene. Govorim za sebe kao vozača. Svi mi se držimo ako je fiksni radar dok pređemo one linije koje su presječene na cesti i onda svako od nas doda gas ili ubrzanje. Kadrovski problem je bio još gori i to načelnik dobro zna, a komandir nije tada radio ovdje u našoj stanici. Mi smo malo izvršili pritisak na ministra, pa je to povećano. Međutim, ne da nama ovdje treba da bude 35, treba da bude 45 policajaca iz raznoraznih razloga, pa i geografskog položaja na kojem se nalazi općina Doboj Istok. Mi ćemo u narednom periodu, ja kao načelnik općine i načelnik policije, iskoristiti svoje autoritete da pokušamo, pored toga što će se ispeglati ovaj nedostatak ljudi da ga još više povećamo i da se donese nova sistematizacija koliko to pripada Policijskoj stanici Doboj Istok. Policija radi jedan težak, častan, odgovoran i opasan posao. Ja im na tome čestitam i zahvaljujem se svakom onom ko se prihvati tog posla, jer vidite šta se sve dešava. Čim obuku uniformu i dođu na posao postaju na neki način i meta. Na svu sreću kod nas takvih slučajeva ovdje, a i u bližoj okolini, nije bilo upravo iz tog razloga, pretpostavljam što imaju dobru saradnju sa građanima. Naša Policijska stanica zajedno sa Gračanicom radi jedan fantastičan posao. Često razgovaram sa komandirima i načelnikom, jer mi imamo drugi problem. Kada oni završe svoj posao i predaju tamo kome treba da predaju, tada nastaje problem, pa se to lice pusti, pa vrati i onda dolazi do određenih problema. Oni se susreću sa velikim problemima, koje ovdje nisu pomenuli, mnogo većim problemima. Ima tamo smiješnih stvari sa kojima se susreće načelnik i komandir upravo zbog te nekakve barijere i centralizacije uprave u Kantonu. Da li je to nerazumijevanje ili nedostatak sredstava ja ne znam. Ja znam da su policijskim službenicima povećane, kao i svim budžetskim korisnicima, plate za 6%, naravno to je malo. Ono što znam takođe da je sindikat u pregovorima, pa se ide da se uskladi sa federalnim zakonom i to će biti na neki način normala, mada je opet malo koliko je to opasan i odgovoran posao. Znači, idemo naprijed. Jedan od diskutantata je rekao preventivne mjere i ja sam to dobro razumio i vidio sam da naša stanica radi određene preventivne mjere predavanja u srednjim školama i ja se slažem sa tim. Da li će to biti svaki mjesec u ovisnosti od toga kojim kadrom raspolazete, a možete uključiti bilo koga u ta predavanja, naravno uz našu saradnju. Preventivno djelovanje, po meni, u bilo kojoj oblasti je puno bolje nego da čekamo da dođe do određenih problema. Još jednom čestitam vam na završetku uspješne godine i zahvaljujem se na jednoj korektnoj saradnji koju smo imali u prethodnom periodu.“*

*Mehmed Mehinović, predsjednik kluba vijećnika SBiH: „ Samo jedno pojašnjenje. Ja se nisam dobro izrazio, pa da ne budem dovoljno neshvaćen. Policija radi dobro svoj posao i dobra je saradnja sa školom i to se vidi u izvještaju. Sve je to tačno. Međutim govorio sam sa aspekta da nikad nije dovoljno. Prisustvovao sam jednom slučaju gdje je moglo doći do tuče, sada ne pričam, jer drugačije je kada kažem ovdje za govornicom. Da se nastavi taj rad, možda još malo da se poboljša kako bi spriječili tu mladost razuzdanu, jer imamo mi svi djecu, imamo unučad i što god uradimo u tom pravcu bit će to dobro. Nisam rekao da je loša saradnja, čak da je dobra sa srednjom školom. Dobro je kada policajac prošetava kada je odmor i kada je tu da se vidi. Ovo ne govorim bez razloga, nego govorim sa razlogom, jer sam bio prisutan na jednom ekcesu gdje je moglo doći do nečega da nije mene bilo i zato treba sa djecom razgovarati. Ovo što rade i ako imaju kapaciteta da pojačaju svoj rad u tom smislu ja sam sugerisao.“*

*Semir Halilović, vijećnik SDA: „ Nije replika, ali da iskoristim kao repliku da nešto kažem. Koliko je važno da imamo mi ovakve institucije Policijsku stanicu i Dom zdravlja i sve ostale institucije. Mi smo nažalost imali jedan ružan događaj, to vjerovatno znate, u prošloj sedmici. Tu se vidjela važnost i potreba*

da imamo instituciju kao što je Dom zdravlja u ovom slučaju bio, a tako bi bilo vjerovatno da je bila potreba i intervencija policije. U tom smislu sve pohvale i čestitke uposlenicima koji su koliko god je u njihovoj mogućnosti bilo da reaguju i da pomognu našem dječaku koji je bio bolestan. Nažalost preminuo je, ali nije to do njih, jednostavno medicina ima svoje granice. Zamislite kakva bi situacija bila da je institucija koja se zove Dom zdravlja bila negdje daleko od općine, negdje izmještena, negdje gdje smo mi na periferiji. Koristim priliku, možda malo zloupotrebljavam izvještaj Policijske uprave, ali takva ista bi situacija bila da nemamo svoje Policijske uprave ili bilo koje druge institucije.“

Faruk Avdagić, komandir Policijske stanice Doboj Istok: „Želim da iskoristim ovu priliku da vam se obratim, poštovani načelnice, poštovani predsjedavajući i zamjeniče, uvaženi vijećnici. Najveći problem unutar Policijske uprave i Policijske stanice Doboj Istok je nedostatak policijskih službenika. Kada smo pisali ovaj izvještaj stavili smo da nama fali 5 ovlaštenih službenih lica, a tačnije nama fali 11 ovlaštenih službenih lica. Naime, 5 službenih lica fali po sistematizaciji, tj. 3 službenika su otišla u penziju prije mog dolaska, 2 službenika su napustila u 2018. godini Ministarstvo unutrašnjih poslova, Policijsku stanicu Doboj Istok i otišli u inozemstvo na dalji rad. Imamo situaciju da nam je jedan policijski službenik činovan koji je prešao u Policijsku upravu Gračanica, Policijsku stanicu Gračanica, zatim imamo situaciju da nam je jedan službenik otišao u sektor kriminalističke policije i imamo situaciju da nam je jedan službenik otišao u Policijsku upravu Gračanica koji je raspoređen u timu za otkrivanje narkotika. Uvijek se svakodnevno susrećemo sa bolovanjima obzirom da se radi o starosnoj strukturi većinom starijih policijskih službenika i imamo situaciju da moramo koristiti godišnje odmone. Tako da svakodnevno kroz naš raspored nama fali između 10 i 11 službenika. Kada je u pitanju organizacija posla, nas rijetko ko razumije u ovom kontekstu, pogotovo Ministarstvo naše, jer oni imaju svoje redovne planove, svoje redovne akcije i mi moramo poštovati i moramo njih rješavati. Najveći problem je što mi nemamo ljudi i ne možemo adekvatno odgovoriti svim tim postavljenim zadacima. Kako mi to radimo i kako mi to uspijevamo to samo mi znamo. Znači situacija je sljedeća: kada policijski službenik dođe na prvu smjenu, odradi prvu smjenu, ode kući odmori i ponovo dođe naveče na posao da bi odradili neku od MUP-ove akcije koja je zavedena u dane vikenda. To je ono što je najveći problem ove stanice. Mi sada u toku dana imamo samo jednu auto patrolu. Ta auto patrola je zadužena da bude na dijelu magistralnog puta. Bilo šta da se desi nje nema. Narušavanje javnog reda i mira, povreda na radu, bilo koji segment da se desi oni moraju otići i postupiti po prijavi. Znači mi maltene tu patrolu koristimo za sve i često kada prođete vidjet ćete da nema ni te patrole. To su oni glavni problemi, goreći problemi. Druga stvar, kada su u pitanju materijalno tehnička sredstva, imamo mi solidna materijalno tehnička sredstva i imamo solidna vozila i imamo solidna sredstva veze. Kada su u pitanju plate, tačno je da plate nisu u skladu sa federalnim propisima. Mi treba da budemo na nivou od 80 %, ali mi to nismo. Sindikat je uspio u dosadašnjim dogovorima da se plate u jednom dijelu policijskih službenika, a to je od čina policajca to starijeg narednika poveća za 6,5 % i sada je još jedno povećanje istim policijskim službenicima za 6,5 %, opet da bi došli na nivo od 80 % Federalne uprave policije. Najžalosnije je što je Federalna uprava policije ove godine dva puta sama sebi povećala plate i mi njih i sa ovim povećanjem opet nećemo stići. Kada se tiče promjene ovlaštenja non stop su kroz razne dopise promjene u Zakonu o krivičnom postupku i postupanju policijskih službenika. Educiranost policijskih službenika - mi maltene sami sebi vršimo edukaciju policijskih službenika na osnovu instruktivnih depeša. To je da svakom predočimo šta se desilo, koje su izmjene donesene, da se upoznaju, da se potpišu da su upoznati i da su shvatili to postupanje. Što se tiče pitanja javnog reda i mira, to je kategorija na koju mi ne možemo uticati. Upravo vam govorim iz kojeg razloga, manjak policijskih službenika je jednako manjak policijskih službenika na terenu. Do prošle godine imali smo dva sektora, prvi i drugi, znači policijski službenici koji su bili u mjesnim zajednicama i obilazili svakodnevno u toku službe i preventivno djelovali svojim prisustvom. Sada nažalost toga nemamo, sada imamo jednu patrolu. Ova kategorija je došla do povećanja i ovdje je 7 događaja, a više je prekršaja počinjeno od strane više lica, ali stanje je opet zadovoljavajuće. Ono što je nama jako bitno je da u školama i školskim dvorištima nema zabilježeno narušavanje javnog reda i mira, dok je na sportskim terenima bilo. Ulice, otvoreni prostor tu je došlo do povećanja za 79 %, odnosno razlika je 11 slučajeva koji su zabilježeni i došlo je do smanjenja u trgovinama i drugim zanatskim radnjama. Službenici policije kada govorimo i aspektu sigurnosti 34 lica koja su lišena slobode, gdje su upotrijebljena sredstva prinude, sredstva vezivanja, to su lica koja su prilikom redovnih kontrola zatečena da upravljaju pod uticajem alkohola iznad 1,5 %. Ta lica su potencijalna opasnost, potencijalne ubice na cestama koji ugrožavaju direktno sigurnost prometa i oni se poslije alkotestiranja lišeni slobode i predati u službene prostorije Policijske stanice Gračanica, Policijske uprave Gračanica na zadržavanje do istrežnjenja 12 sati. Prošle



godine takođe u odnosu na prethodnu godinu 142 lica su zatečena da upravljaju pod uticajem alkohola, pored ova 34 što je izuzetno jako velik broj. Što se tiče svih ostalih parametara legitimisanje sumnjivih lica koja se kreću na području naše općine je povećano za nekih 60 lica više u odnosu na prošlu godinu. Izvedeno je šest radnji ograničenja slobode kretanja, to su takozvane racije, bilo je dva pretresa porodičnih kuća i pomoćnih objekata, imali smo četiri prijavljena djela nasilja u porodici. Kada govorimo o aspektu nasilja u porodici ovdje nam je generalno problem što jako puno imamo posla oko toga, a na kraju završnica toga je katastrofalna i poražavajuća. Naime, izuzetno je dobra saradnja policijskih službenika sa Centrom za socijalni rad i Domom zdravlja i sve mi to odradimo i kada podnesemo izvještaj tužilaštvu protiv lica supružnika ili djece ili roditelja i kada ode na tužilaštvo oni se pozovu na blagodeti člana 97. da on može u svakom momentu odustati od prijave. Džaba smo mi vodili posao, svi kompletno kao zajednica odradili, to spadne na ništa. Nažalost to je nevidljiv posao, a jako ga puno ima. Po pitanju stacionarnog radara, mi nemamo stacionarni radar, ali smo uspjeli u 2018. godini dobiti prenosni, laserski radar koji je pokazao izuzetno dobre rezultate. Činjenica je da u četiri akcije koje smo imali u mjesec dana po dva sata zabilježeno 130 prekoračenja brzine. Tačno je da su to većinom, što je frapantan podatak, teretna motorna vozila u prekoračenju brzine kretanja i to većinom sa drugih općina, ne sa naše općine. Naši se ovdje i privrednici i građani ponašaju u skladu sa pravilima, jer na ulazu u općinu postoji tabla i postoji tabla na izlazu iz općine, odnosno sa gornje strane. Ono što sam uspio dobiti kao podatak sa ovog stacioniranog brojača prometa, da je za 11 mjeseci u 2018. godini 4 miliona vozila prošlo kroz našu općinu. Ipak je to ogroman broj vozila koja su prošla, a kada uzmemo parametre da je ove godine daleko više kontrolisano, daleko više naloga napisano, čak je za 400 više naloga napisano u odnosu na prošlu godinu i da je kontrolisano gotovo za 1000 vozila više, da je manji broj saobraćajnih nezgoda za 12, sa ovim pokazateljima o broju prometa vozila je odličan rezultat. Sa ovim kapacitetom koji mi imamo je odličan rezultat. U narednom periodu nastavit ćemo sa ovim radarom raditi. Ja znam da se građani bune, da im nije pravo, ali Bože moj svi mi smo vozači, učesnici u saobraćaju i trebamo da poštujemo propise. Kada govorimo o ovim pojedinačnim kroz redovne akcije koje smo vršili po pitanju saobraćaja tu smo prošle godine imali 1904 naloga izrečena, a ove godine 2306 i za 402 naloga više u odnosu na prošlu godinu. Broj vozača koji su zatečeni bez upotrebe sigurnosnog pojasa kroz provedene akcije 59 u 2017. godini, a ove godine je 93, što je razlika 34, odnosno 106%. Vozači koji su zatečeni da koriste mobilitel 36 u 2017. godini, a 79 u 2018. godini, što je za 43 više, odnosno 119 %. Kontrolisano je i legitimisano vozača i vozila 201 u 2017. godini, a 259 u 2018. godini, a pregledali smo 3.746 vozača i vozila. Zbog upotrebe alkohola rekli smo 142, a prije sticanja prava upravljanja, odnosno bez položenog vozačkog ispita zatekli smo 31 vozača, u odnosu na prošlu godinu kada je bilo 20, što je više za 11. Zaštitne mjere što je jako interesantno u 2017. godini su bila 2 prekršaja, a u ove godine 11 prekršaja, što je za 9 prekršaja više u odnosu na prošlu godinu. Kada govorimo o strukturi povrijeđenih lica, sa teško povrijeđenim licima u 2017. godini smo imali 4, a u 2018. godini 6, sa lakše povrijeđenim licima imali smo u 2017. godini 13, a u 2018. godini 18 i sa materijalnom štetom imali smo 48 u 2017. godini, a 28 u ovoj godini, što znači da je manje 20, odnosno 42% manje. Nažalost imali smo jedno lice koje je smrtno stradalo, a radi se licu koje se vraćalo sa tzv. partija i bilo je pod uticajem psihoaktivnih stimulansa, gdje je suvozač izgubio život. Većina saobraćajnih nezgoda desila se na magistralnom putu, to je put koji je najprometniji. Kada govorimo o stanju kriminaliteta u krivičnom djelu protiv zdravlja ljudi, zloupotreba psihoaktivnih supstanci u 2017. godini imali smo 7 podnesenih izvještaja o počinjenom krivičnom djelu, dok smo u 2018. godini imali 13 izvještaja o počinjenom krivičnom djelu, što je znači za 6 izvještaja u odnosu na prošlu godinu. Opet vam napominjem sa kojim mi obimom policijskih službenika raspolažemo izuzetno je dobar rezultat. Većinom, što je malo zabrinjavajuće, nema povratnika i uvijek se nova lica dovode u vezu sa počinjenjem ovih krivičnih djela. U strukturi što smo je naveli kada govorimo o materijalnoj šteti činjenica je da je došlo do povećanja počinjenja ovih krivičnih djela, ali je u pogledu materijalne štete daleko manja. Prošle godine ukupna materijalna šteta za sva počinjena krivična djela bila 27.420 KM, a sada je ta šteta 9.000 KM. Kada govorimo o krivičnim djelima koju su počinili maloljetnici radi se o 4 maloljetnika koja su vršila provale u vikendice u obližnjim naseljima. Ono što bih ja istakao što je jako bitno kada je u pitanju nelegalan rad u oblasti prevoza posmatrano januar – decembar 2017 – 2018. godine, općina Dobož Istok kao jedna jako jako mala Policijska stanica sa jako malim brojem policijskih službenika je imala bolje rezultate nego 90 % ostalih policijskih stanica na nivou Ministarstva unutrašnjih poslova. Tako da smo prošle godine kontrolisali, kada je u pitanju nelegalan prevoz, 1226 vozača i vozila, a ove godine 1638. Izdali smo prošle godine 132 naloga po ZOPS-u u kontrolama, a ove godine izdali smo 228 naloga, po cestovnom prevozu prošle godine smo izdali 5 i ove godine 5 za nelegalan prevoz vozila. Ono što nama ovdje predstavlja konkretno problem je nelegalan prevoz koji se odnosi na poznavanje

vozača, ovdje lokalnih, koji uzmu putnike i kada mi zaustavimo i ispitamo svi kažu to mi je rođak, to mi je prijatelj, to mi je komšija koji me je povukao do kuće i mi ne možemo naći modus dokazivanja počinjenja tog prekršaja. Većinom što se tiče nelegalnog prevoza to su taksisti koji vrše prevoz sa drugih općina, kada krene iz Doboja pa se zaustavi ovdje. Što se tiče pitanja teretnih motornih vozila tačna je činjenica da je najveći promet teretnih motornih vozila. Ono što mi možemo poduzeti kroz naše akcije lokalnog karaktera to je ograničenje brzine kretanja, pregled tereta koji se prevozi, kao činjenice za opterećenje osovinsko. Svakodnevno policijske patrole vrše obilazak putne dionice koje fotografišu oštećenja nastala na kolovozu i te fotografije zajedno sa popratnim aktom pošaljemo Direkciji federalnih cesta i Direkciji kantonalnih cesta kako bi oni dalje poduzimali mjere iz svoje nadležnosti. Ja bih ovdje još napomenuo da kompletno svi postignuti rezultati aktivnosti preventivnog i represivnog djelovanja svih službenika Policijske stanice Doboj Istok i operativnih i taktičkih mjera i radnji i provedenih akcija dovele su do ovakvih rezultata. Ono što bih napomenuo, a što nije prošlo kroz ovaj izvještaj, a odrađen je dobar posao, a to su pripadnici odjeljenja kriminalističke policije PU Gračanica, Policijske stanice Gračanica i Policijske stanice Doboj Istok odakle su sve aktivnosti krenule, službenika naše Policijske stanice rezultiralo otkrivanjem 23 krivična djela na staničnom području Doboj Istoka, staničnom području Gračanice i staničnom području Doboja, Republika Srpska. Tako smo na našem staničnom području otkrili pet krivičnih djela i to krivično djelo na štetu Humić Uzeira iz Stanić Rijeke, otuđenje hidrauličnog cilindra i hidrauličnog crijeva, predmeti svi pronađeni i vraćeni vlasniku, krivična djela na štetu Buljić Senada iz Brijesnice Velike, otuđen hidraulični cilindar koji je pronađen i vraćen vlasniku, krivično djelo na štetu d.o.o. „NSB“ Klokotnica, gdje je otuđeno 600 litara nafte, dizel goriva, 2 akumulatora, 2 lanca dužine 3 metra sa kukama, 5 španera koje je isto pronađeno i vraćeno vlasniku i krivično djelo na štetu Babić Omera iz Klokotnice otuđenje 2 kardana koja su pronađena i vraćena. Ovo je izuzetno dobar rezultat koji nije ušao u statistički izvještaj za ovu godinu. Ja takođe želim da se zahvalim svima vama, a posebno načelniku općine, obzirom da smo imali priliku da saradujemo i kada god imamo neku problematičnu situaciju načelnik nam izađe u susret. Takođe želim da se zahvalim svim javnim ustanovama, direktorima škola, nastavnicima i školskom osoblju sa kojima imam izuzetno dobru saradnju. Zatim da se zahvalim Domu zdravlja i Hitnoj pomoći prilikom realizacije svih poslova kako njihovih tako i naših, Centru za socijalni rad i predsjednicima Mjesnih zajednica, jer samo zajedno možemo doprinijeti jačanju i boljoj saradnji u rješavanju naše problematike.“

Safet Ibrahimović, načelnik Policijske uprave Gračanica: „Koristim ovu priliku da vas sve pozdravim i poselamim. Na neki način dužnost mi je da odgovorim na pitanja koja nisu u nadležnosti Policijske stanice nego su u nadležnosti Policijske uprave i Uprave policije Tuzlanskog kantona. Naime, kada je u pitanju sistematizacija o kojoj je bilo riječi ovdje tačno je ovo što je komandir naglasio da nedostaje određeni broj službenika. Međutim problem je u samom kandidovanju kadeta za policiju koji se provodi na nivou Ministarstva unutrašnjih poslova i nedovoljan broj sa ovog područja i područja općine Gračanica jeste i uzrok zbog čega imamo i nedostatak tih službenika koji bi obnovili ove policijske stanice. U posljednjih nekoliko godina imali smo povećan broj penzionisanja, tako da sam prijem kadeta i penzionisanje nisu bili u skladu. Dakle daleko veći broj ljudi je odlazio u penziju iz razloga što je donesen novi zakon, odnosno bila je pretpostavka da će biti donesen i donesen je na kraju, pa smo imali iz tih razloga povećan broj penzionisanja ljudi. Međutim imamo ovdje problem invalidnosti i Policijska stanica Gračanica i Policijska stanica Doboj Istok imaju priličan broj policijskih službenika koji su invalidi druge kategorije sa ozbiljnim povredama gdje se u njihovim nalazima navodi da oni nisu sposobni za nošenje recimo oružja i nisu sposobni za obavljanje poslova na terenu da dugo stoje da rade sa strankama. Takvim službenicima je potrebno naći drugo radno mjesto u okviru Ministarstva unutrašnjih poslova, odnosno u okviru policijskih stanica. Dakle susreću se i komandiri i načelnici policijskih uprava da moramo takvim ljudima naći lakše radno mjesto i takvi se mogu staviti samo da rade u kancelarijama. Za njih praktično i nema određenog radnog mjesta po rješavanju koje bi oni radili. Oni se vode kao policajci, kao i svi ostali, a sjede i rade u kancelariji iako takvi nisu potrebni u tom broju radnika. Dakle na takav način se snalazimo, a što se tiče prijema novih kadeta u toku je jedna tranša tih kadeta koja treba da završava i da dođe na praksu u Ministarstvo, pa se nadamo da ćemo dobiti određeni broj službenika. Isto tako je druga spremna za odlazak na akademiju u Sarajevo. Ono što bi u narednom periodu slijedilo trebalo bi povećati taj broj kadeta posebno kada je u pitanju naše područje. Na taj način ćemo imati to smanjenje, a vidjet ćemo kako će se odvijati poslovi oko penzionisanja po novom zakonu, da li ćemo imati povećan ili smanjen broj penzionisanja. Neko je postavio pitanje vezano za promjenu ovlaštenja što je navedeno u izvještaju. Ne misli se da mi imamo sada manja ovlaštenja, mi imamo praktično dovoljno

ovlaštenja i ta ovlaštenja nisu samnjenja. Možda je nespretno napisano u samom izvještaju, policija ima dovoljno ovlaštenja, ali samo iz nekih drugih razloga nismo u mogućnosti rješavati probleme kao što se to nekada spominjalo kao milicija. Danas postoji unutrašnja kontrola, imamo danas i snimanje šta policija radi na terenu, pa je iz tih razloga veća sloboda građanina i onih kriminalno aktivnih lica u izvršavanju zadataka policije da radi onoliko koliko mu zakon dozvoljava ni malo ni više. Znači da upotreba sredstava prinude mora biti tačno onoliko koliko je zakonom određena, jer za svako prekoračenje na osnovu tih i takvih parametara i dokaza može da odgovara policijski službenik. Ono što se vidi i u samom izvještaju da su pojačane aktivnosti bile policije po raznim segmentima upravo iz razloga što je i Ministarstvo zahtijevalo, jer je to u programu, da se smanji broj krivičnih djela i saobraćajnih nezgoda, ali se nije moglo na čitavom području. Činjenica je da kroz Gračanicu i Doboj Istok imamo veliki broj vozila koja prolaze i povećana je mogućnost da se dogodi saobraćajna nezgoda. Nismo srećom imali u Doboj Istoku poginulih, ali smo imali povećan broj teže povrijeđenih i lakše povrijeđenih u odnosu na prethodnu godinu. Nisu imali radara, a sada imaju radar koji može mijenjati pozicije tako da vozači ne znaju gdje se nalazi. Gračanica je imala, pa je smanjila broj teže povrijeđenih i lakše povrijeđenih iz razloga što su vozači smanjili brzinu. Znači kada se smanji brzina, ako dođe do nezgode manje su sigurno posljedice. Iz tih razloga se ti radari i koriste. Što se tiče stacionarnog radara MUP je pokušao prije dvije godine da nabavi te radare, tender je bio problem. Bilo je određeno mjesto u Velikoj Brijesnici zbog Policijske stanice, zbog srednje i osnovne škole da se stavi stacionarni radar koji bi se mijenjao na mjestu u Gračanici u Donjoj Orahovici tako da vozači ne znaju kada je tu radar, a kada nije. On ima svoju i preventivnu i regresivnu funkciju, ali za sada nemamo pa su izvršili nabavku po još jednog redara u onim policijskim stanicama koje nisu imale, a među njima je i Doboj Istok. Dakle nadamo se da će u narednom periodu i to doprinijeti da se smanje brzine kretanja kroz ovo vaše naselje. Ovdje je neko spomenuo da li je potrebno postavljati znak radarska kontrola. Taj znak zakonom nije obavezan, obavezan je znak okrugli, znak izričite naredbe, ograničenja brzine kojeg se vozači pridržavaju, a znak radarska kontrola spada u grupu znakova obavještenja i nije obavezan. Ministarstvo je nama uputilo jedan akt u kome smo mi predložili na onim mjestima gdje je potrebno da se postave takvi natpisi, odnosno ti znakovi obavještenja. Ovdje je komandir spomenuo da određeni broj službenika radi u Ministarstvu, vode se u Policijskoj stanici Gračanica ili Doboj Istok, pa su angažovani za određene potrebe na nivou Ministarstva. To su uglavnom službenici koji rade po drogama. Ovdje je neko spomenuo da je daleko više nego što se može vidjeti kroz izvještaj, činjenica je da i jeste, ali ovo se radi samo o krivičnim djelima. Nekada je konzumiranje bio prekršaj, pa je bilo lakše procesuirati takve slučajeve, a sada je to krivično djelo. Ovdje se više nastoji kroz rad Ministarstva unutrašnjih poslova, pa zato su jedan službenik iz Gračanice i jedan službenik iz Doboj Istoka angažovani na tim poslovima. Ako ste možda i primijetili da oni rade i na ovom području i zahvaljujući upravo tim poslovima, a i poslovima gdje je jedan službenik iz Doboj Istoka angažovan na nivou Policijske uprave Gračanica koji striktno rade po drogama, a oni rade i na području Doboj Istoka i na području Gračanice. Iz tih razloga i imamo povećanje ovih izvještaja s tim da postoji još rezultata koji nisu prikazani iz razloga što vještačenja nisu obavljena, nisu obavljene one potrebne radnje da bi sada ušlo to u izvještaj kao krivično djelo, ali u narednom periodu i to slijedi. Kada je u pitanju odjeljenje za administraciju i podršku u medijima ste vidjeli da pojedine općine vraćaju CIPS u okviru policijskih stanica zbog izdataka koje imaju kada zakupljuju druge prostore. Čini mi se da je to slučaj ovdje u Doboj Istoku, kao i u Gračanici. Oni su sada napravili za nekoliko općina ta rješenja i sada slijede i ove ostale naspram sredstava koje ima Ministarstvo unutrašnjih poslova. Prirodno bi bilo da odjeljenje za administraciju bude na jednom mjestu. Kada će u Gračanici to uraditi i kada će u Doboj Istoku to uraditi i na koji način to za sada ne znamo. Kada je u pitanju pristupna rampa ja znam da je u Gračanici općina dostavila Ministarstvu unutrašnjih poslova, odnosno Policijskoj upravi zahtjev i rješenje u kojem smo dužni da u određenom roku napravimo tu rampu za invalidna lica i ona ni do danas dan nije riješena, ali će se morati rješavati zajedno kada se bude rješavala šalter sala, znači kada se bude vraćao CIPS. Na isti način se to može i ovdje uraditi, jer je onaj čiji je objekat, odnosno onaj koji radi u tom objektu je dužan da napravi tu pristupnu rampu za invalide. To bi bilo toliko od mene i ja se zahvaljujem svima, a posebno onim građanima koji saraduju sa policijom. Mi ćemo i ove godine kao i prethodne godine, a nastojati ove godine još i više, održati predavanje gdje će dolaziti iz Ministarstva unutrašnjih poslova na različite teme zavisno od škole, da li je to srednja ili osnovna škola. Ovdje je upućen apel da i građani trebaju dojavljivati, odnosno saradivati sa policijom. Usput je neko ovdje rekao kada je bilo oko ove saradnje da ako građanin prijavi odmah se za pola sata ili sat vremena zna ko je prijavio. Da razjasnimo malo taj dio. Postoje različiti načini kako dođe neko do informacije da je on odnio prijavu. Policija kada zaprima prijavu ta prijava ima svoj tok. Nešto je od toga tajno, a nešto nije. Ne može niko drugi dobiti podatak

osim onoga ko se obrati pismeno, a odnosi se na njega. Kada policija izlazi ako je neko konkretno prijavljen, ako ja prijavljujem konkretno lice, policija mora tada kazati ko tebe prijavljuje za određeno krivično djelo koje je učinio prema tebi. Ako je opšte, ako je nešto učinjeno drugome, onda taj policajac ne smije i ne može govoriti odakle je prijava, niti drugi mogu to saznati. Dakle to ostaje unutar Policijske uprave. Sada postoji mogućnost da neko negdje to ispriča ili kaže, a policija to ne bi smjela, jer mi imamo unutrašnje kontrole u tom dijelu ukoliko se sazna da je neko odao takvu tajnu policije on disciplinski odgovara kao i u svakom sistemu. Vrlo često se dešava ovo da građani vide da je neko ušao u Policijsku stanicu i ako se poslije taj događaj prijavljuje on pretpostavlja da je taj prijavio ili on ispriča negdje na određenom mjestu, pa onda kaže to je iz policije. Dakle postoje različiti načini kako informacije mogu da dođu. Mi smo imali ovaj događaj, a neko ga je spomenuo, predmet Vehabović Muhamed, gdje se htjelo iskoristiti da se napravi i ovdje pravda za Muhameda, kao pravda u Banja Luci i pravda u Sarajevu, ali nisu u tome uspjeli iz razloga što je policija uradila svoj dio posla. Da li je neko negdje tu zatajio? Jeste, onaj ko je prvu informaciju imao, a nije ju prenio policiji, nego je prenio nekome drugom, pa je policija morala tragom na osnovu te informacije doći do pravih informacija, pa da se postupak završi. Hvala Bogu završili smo to kako valja, ali vidjeli smo kakve su posljedice za neprijavljivanje i onoga ko je bio prisutan tom, a trebao je da prijavi i hitnoj i policiji, a nije to uradio. Dakle, mi smo za taj slučaj podnijeli odgovarajuću prijavu nadležnom tužilaštvu i tužilaštvo je sada na redu da procesuiraju to.“

Dr. Ferid Konjić, predsjedavajući Općinskog vijeća: „Ima li još diskutacija? Ne vidim prijavljenih i dajem na izjašnjenje. Ko je za ovu Informaciju?“

Glasanje: ZA – 15, PROTIV – 0, UZDRŽANIH – 0.

#### **Ad.9. Razmatranje i usvajanje Informacije o pripremnim aktivnostima za proljetnu sjetvu 2019. godine.**

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Bit ću što je moguće kraća da ne prođe ova informacija bez diskusija. Odmah ću se dotaknuti tabele - struktura proljetne sjetve za 2019. godinu, primjećujemo porast u planiranim sjetvenim strukturama što je pohvalno pogotovo u ovom vremenu. Zaista ovo treba isticati, a ne samo kada se nešto smanjuje, pa potrošimo vremena i vremena, a zapravo nemamo šta uticati na neka smanjenja. Na povećanja itekako treba gledati pohvalno i uticati da budu i veća. Ja bih se takođe dotakla ovog dijela u kojem govorite o plasteničkoj proizvodnji, gdje kažete da je najrentabilniji vid proizvodnje po jedinici površine. Od prošle sjetvene sezone povećala se za oko 3.000 m<sup>2</sup>. Postojeća minimalna novčana podrška stimulatивно utiče na ovu proizvodnju. Takođe na javnoj raspravi, mada prisutni vide da inicijative i amandmani od strane opozicije ne prolaze, ali ja ću i dalje svoj kurs da držim, upravo sam u ovom dijelu govorila kako bi trebalo povećati podsticaje, ali direktno usmjeravati ka plasteničkoj proizvodnji. Nisam vizionar, ali smatram da je to naša budućnost. Dakle trebalo bi u budžetu, ako se ima malo više sluha, ipak planirati neka pozamašnija sredstva za ovu problematiku. Formiranje općinske komisije, navodite na kraju kao prijedlog mjera, općinsko vijećničke komisije za poljoprivredu i možda ste trebali razjasniti koje bi ingerencije imala ova komisija, odnosno šta bi joj bio djelokrug rada. Mi kroz Vijeće ipak nešto, a zahvaljujući predsjedavajućem koji je uvrstio u program rada Općinskog vijeća ovu tačku, raspravljamo, a slažem se samo ne znam koje bi joj ingerencije bile i ako možete da pojasnite.“

Samir Mujkić, stručni saradnik za ruralni razvoj: „Prije svega želim sve da vas poselamim i pozdravim. Što se tiče prvog pitanja povećanja obima proljetne sjetve to je kompezacija jesenje sjetve, odnosno uslova u jesenjem periodu kakvi su bili, odnosno nisu bili dobri uslovi za jesenju sjetvu i to je kombinacija na proljetnu i mora se na neki način prenijeti. Što se tiče plasteničke proizvodnje ona ima neku perspektivu i po jedinici površine ima najveću proizvodnju. I ove godine imamo nagovještaj da će ići javni poziv po pitanju plasteničke proizvodnje u nabavci plastenika. Organizacija koja je prošle godine učestvovala u projektu i iz kontakta sa njima rekli su mi da ne bi bilo realno da našu općinu svake godine tretiraju u proljeće i da bi nas prenijeli na jesen. Tako da idemo u rotaciju sa nekim drugim općinama koje će ići u proljeće, a nas će prenijeti u jesen. Znači ići će ta realizacija projekta i u dogovoru sa načelnikom

imaju predviđena sredstva budžetom, jer će jednim dijelom ići sredstva iz budžeta, finansiranja organizacija i samih korisnika. Znači ići će taj projekat u toku ove godine. Što se tiče komisije, ta komisija postoji u nekim općinama i oni mogu raspravljati o svim pitanjima. To sam stavio iz razloga što sam kroz informaciju navodio da poljoprivredna proizvodnja kod nas nije baš na nivou organizovana u smislu poljoprivrednih proizvođača. Ja sam pokušavao ta poljoprivredna udruženja da organizujem, da ih dovedem, da im ja zakažem skupštinu, ali smatrali su da ja to hoću da ih razbrčem, da ovo, da ono. Nekim ljudima sam govorio da ako znaš proizvesti nešto, možda ne znaš voditi to što vodiš i našli su se uvrijeđeni. Nailazio sam na razne otpore i promijenili su malo strukturu toga, ali ne vidim njihov učinak i rad. Iz tog razloga mislim da te poljoprivrednike i ljude koji su zainteresovani oko same poljoprivrede da uvučem na neki način. Često puta sam im rekao kada participira sport oko 50.000 u budžetu općine zamislite da poljoprivrednici zahtijevaju i veću stavku. Neko se izborio za tu sportsku aktivnost da uđe u budžet, tako neko treba da se izbori i za poljoprivredni segment, a ko će drugi nego ljudi koji se bave poljoprivrednom proizvodnjom. Iz tih razloga mislim da ima mjesta da bude ta jedna vijećnička komisija koja bi bila za segment poljoprivrede, koja bi bila koordinacija između poljoprivrednika i poljoprivrednih udruženja i same službe koja se bavi time. U tom smislu sam mislio. Nije nepoznanica, jer postoje kantonalna i u nekim općinama postoje te komisije i iz tih razloga mislim da bi u nekom smislu poboljšanja bilo dobro da se formira u nekom periodu.“

Dr. Ferid Konjić, predsjedavajući Općinskog vijeća: „ Obzirom da sam ja na neki način ovo pitanje davno delegirao, ali ni dalje nisam zadovoljan sa ovim radom. Ova komisija i ja sam to već negdje i rekao šta mislim da treba. Mislim da kod nas najčešće samouko, sve što radimo sami učimo ili jedni od drugih ili ovako. Ova komisija bi u suštini trebala pokupiti stručne ljude koji mogu, jer ne može Samir sam izaći na teren i vidjeti šta ljudima treba pomoći konkretno. Vjerovatno bi posticaj mogao biti bolji u tom smislu da se ljudima pomogne od same pripreme terena i dalje stalnog nadzora u samoj toj proizvodnji i davanja savjeta nego što se može dati na konačnici. Mislim da bi morali početi koristiti struku što više u bilo čemu, pa tako i u poljoprivredi. Znači da se okupe stručna lica sa naše općine, a mogu se iznaći sredstva da se plate da vrše nadzor, znači pomoć samim tim proizvođačima u svim segmentima. Ima li još diskutanata? Nema. Ko je za ovu informaciju?

Glasanje: ZA – 15, PROTIV – 0, UZDRŽANIH – 0.

**Ad.10. Razmatranje zahtjeva Mjesne zajednice Lukavica Rijeka za davanje saglasnosti za izgradnju ambulante.**

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih i dajem na izjašnjavanje. Ko je za davanje saglasnosti?

Glasanje: ZA – 15, PROTIV – 0, UZDRŽANIH – 0.

**Ad.11. Razmatranje zahtjeva Hodžić (Smajla) Mehe iz Klokotnice za davanje saglasnosti susjeda.**

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?

Glasanje: ZA – 15, PROTIV – 0, UZDRŽANIH – 0.

Na ovaj način smo iscrpili današnji dnevni red. Hvala vam na učešću u radu ove sjednice ovog saziva Općinskog vijeća.“

Sjednica je završena u 12,35 sati.

ZAPISNIČAR  
Behara Hadžić

SEKRETAR  
Omer Hadžić

PREDSJEDAVAJUĆI  
OPĆINSKOG VIJEĆA  
dr. Ferid Konjić

*Službena zabilješka:*

*Zapisnik je usvojen na 25. redovnoj sjednici Općinskog vijeća Doboju Istok održanoj dana 30.03.2019. godine.*

*U Klokočnici, dana 01.04.2019. godine*

*Zabilješku sačinio  
Omer Hadžić, sekretar Općine*